

# Mithali

## *Utangulizi: Kusudi Na Kiini*

- 1 Mithali za Solomoni mwana wa Daudi, mfalme wa Israeli:
- 2 Kwa kupata hekima na nidhamu; kwa kufahamu maneno ya busara;
- 3 kwa kujipatia nidhamu na busara, kufanya lililo sawa, haki na bila kupendelea;
- 4 huwapa busara wajinga, maarifa na akili kwa vijana;
- 5 wenye hekima na wasikilize nao waongeze elimu yao, wenye kupambanua na wapate mwongozo;
- 6 kwa kufahamu mithali na mifano, misemo na vitendawili vyta wenye hekima.
- 7 Kumcha BWANA ndicho chanzo cha maarifa, lakini wapumbavu hudharau hekima na adabu.

## *Onyo Dhidi Ya Ushawishi Wa Marafiki Waovu*

- 8 Mwanangu, sikiliza mwongozo wa baba yako, wala usiyaache mafundisho ya mama yako.
- 9 Hayo yatakuwa taji la maua la neema kichwani pako, na mkufu wa kuipamba shingo yako.
- 10 Mwanangu, kama wenye dhambi wakikushawishi, usikubaliane nao.
- 11 Kama wakisema, "Twende tufuatane;

- tukamvizie mtu na kumwaga damu,  
njoo tukavizie nafsi isiyo na hatia;
- 12 tuwameze wakiwa hai kama kaburi,\*  
wakiwa wazima kama wale wanaotumbukia  
shimoni.
- 13 Tutapata aina zote za vitu vya thamani  
na kujaza nyumba zetu kwa nyara.
- 14 Njoo ushirikiane nasi,  
vitu vyote tutakavyopata tutagawana."
- 15 Mwanangu, usiandamane nao.  
Usiweke mguu wako katika njia zao,
- 16 kwa kuwa miguu yao hukimbilia kwenye  
dhambi,  
ni wepesi kumwaga damu.
- 17 Tazama ni jinsi gani ilivyo kazi bure kutandaza  
wavu  
wakati ndege wote wanakuona!
- 18 Watu hawa huvizia kumwaga damu yao  
wenyewe;  
hujivizia tu wenyewe!
- 19 Huu ndio mwisho wa wote ambao wanajipatia  
mali kwa hila;  
huuondoa uhai wa wale wenye mali.

### *Onyo Dhidi Ya Kukataa Hekima*

- 20 Hekima huita kwa sauti kuu barabarani,  
hupaza sauti yake kwenye viwanja vikubwa;
- 21 kwenye makutano ya barabara za mji  
zenye makelele mengi hupaza sauti,  
kwenye malango ya mji hutoa hotuba yake:

---

\* **1:12** Kaburi hapa maana yake ni Kuzimu, kwa Kiebrania ni Sheol.

- 22 "Enyi wajinga, mtang'ang'ania ujinga wenu  
hadi lini?  
Mpaka lini wenye mizaha watafurahia  
mizaha,  
na wapumbavu kuchukia maarifa?
- 23 Kama mngekuwa mmeitikia karipio langu,  
ningekuwa nimemimina roho yangu kwenu  
na kuwafahamisha maneno yangu.
- 24 Lakini kwa kuwa mlinikataa nilipowaita  
na hakuna yejote aliyekubali  
niliponyoosha mkono wangu,
- 25 kwa kuwa mliyapuuza mashauri yangu yote  
na hamkukubali karipio langu,
- 26 mimi nami nitawacheka katika maafa yenu,  
nitawadhihaki wakati janga litawapata:
- 27 wakati janga litawapata kama tufani,  
wakati maafa yatawazoa kama upepo wa  
kisulisuli,  
wakati dhiki na taabu zitawalemea.
- 28 "Ndipo watakaponiita lakini sitawajibu;  
watanitafuta lakini hawatanipata.
- 29 Kwa kuwa walichukia maarifa,  
wala hawakuchagua kumcha BWANA,
- 30 kwa kuwa hawakukubali mashauri yangu,  
na kukataa maonyo yangu,
- 31 watakula matunda ya njia zao,  
na watashibishwa matunda ya hila zao.
- 32 Kwa kuwa ukaidi wa wajinga utawaua,  
nako kuridhika kwa wajinga  
kutawaangamiza.
- 33 Lakini yejote anisikilizaye ataishi kwa us-  
alamia,

atatulia, bila kuwa na hofu ya madhara.”

## 2

### *Faida Za Hekima*

- 1 Mwanangu, kama utayakubali maneno yangu na kuyaweka akiba maagizo yangu ndani mwako,
- 2 kutega sikio lako kwenye hekima na kuweka moyo wako katika ufahamu,
- 3 na kama ukiita busara na kuita kwa sauti ufahamu,
- 4 na kama utaitafuta kama fedha na kuitafuta sana kama hazina iliyofichwa,
- 5 ndipo utakapoelewa kumcha BWANA na kupata maarifa ya Mungu.
- 6 Kwa maana BWANA hutoa hekima, na kinywani mwake hutoka maarifa na ufahamu.
- 7 Anahifadhi ushindi kwa ajili ya mwadilifu, yeeye ni ngao kwa wale wasio na lawama,
- 8 kwa kuwa hulinda mwenendo wa mwenye haki na kuhifadhi njia ya waaminifu wake.
- 9 Ndipo utafahamu lipi lililo kweli na haki na sawa: yaani kila njia nzuri.
- 10 Kwa maana hekima itaingia moyoni mwako, nayo maarifa yataifurahisha nafsi yako.
- 11 Busara itakuhifadhi na ufahamu utakulinda.
- 12 Hekima itakuokoa kutoka njia za waovu, kutoka kwa watu ambao maneno yao yame-potoka,

- 13 wale waachao mapito yaliyonyooka  
wakatembea katika njia za giza,  
14 wale wapendao kutenda mabaya  
na kufurahia upotovu wa ubaya,  
15 ambao mapito yao yamepotoka  
na ambao ni wapotovu katika njia zao.
- 16 Itakuokoa pia kutokana na mwanamke ka-haba,  
kutokana na mke aliyepotoka mwenye ma-neno  
ya kushawishi kutenda ubaya,  
17 aliyemwacha mwenzi wa ujana wake  
na kupuuza agano alilofanya mbele ya Mungu.  
18 Kwa maana nyumba yake huelekea kwenye kifo  
na mapito yake kwenye roho za waliokufa.  
19 Hakuna ye yote aendaye kwake akarudi,  
au kufikia mapito ya uzima.
- 20 Hivyo utatembea katika njia za watu wema  
na kushikamana na mapito ya weny haki.  
21 Kwa maana wanyofu wataishi katika nchi,  
nao wasio na lawama watabakia ndani yake.  
22 Bali waovu watakataliwa mbali kutoka nchi,  
nao wasio waaminifu watang'olewa kutoka humo.

## 3

*Faida Nyingine Za Hekima*

- <sup>1</sup> Mwanangu, usisahau mafundisho yangu,  
bali zitunze amri zangu moyoni mwako,

- <sup>2</sup> kwa kuwa zitakuongezea miaka mingi ya  
maisha yako  
na kukuletea mafanikio.
- <sup>3</sup> Usiache kamwe upendo na uaminifu vitengane  
nawe;  
vifunge shingoni mwako,  
viandike katika ubao wa moyo wako.
- <sup>4</sup> Ndipo utapata kibali na jina zuri  
mbele za Mungu na mwanadamu.
- <sup>5</sup> Mtumaini BWANA kwa moyo wako wote  
wala usizitegemee akili zako mwenyewe;
- <sup>6</sup> katika njia zako zote mkiri yeye,  
naye atayanyoosha mapito yako.
- <sup>7</sup> Usiwe mwenye hekima machoni pako  
mwenyewe;  
mche BWANA ukajiepushe na uovu.
- <sup>8</sup> Hii itakuletea afya mwilini mwako,  
na mafuta kwenye mifupa yako.
- <sup>9</sup> Mheshimu BWANA kwa mali zako na  
kwa malimbuko ya mazao yako yote;
- <sup>10</sup> ndipo ghalu zako zitakapojaa hadi kufurika,  
viriba vyako vitafurika kwa mvinyo mpya.
- <sup>11</sup> Mwanangu, usiidharau adhabu ya BWANA  
na usichukie kukaripiwa naye,
- <sup>12</sup> kwa sababu BWANA huwaadibisha wale  
awapendao,  
kama vile baba afanyavyo  
kwa mwana apendezwaye naye.

- 13 Heri mtu yule aonaye hekima,  
       mtu yule apataye ufahamu,
- 14 kwa maana hekima ana faida kuliko fedha  
       na mapato yake ni bora kuliko ya dhahabu  
       safi.
- 15 Hekima ana thamani kuliko marijani;  
       hakuna chochote unachokitamani  
       kinachoweza kulinganishwa naye.
- 16 Maisha marefu yako katika mkono wake wa  
       kuume;  
       katika mkono wake wa kushoto  
       kuna utajiri na heshima.
- 17 Njia zake zinapendeza,  
       mapito yake yote ni amani.
- 18 Yeye ni mti wa uzima kwa wale wanaomkum-  
       batia;  
       wale wamshikao watabarikiwa.
- 19 Kwa hekima BWANA aliiweka misingi ya dunia,  
       kwa ufahamu aliziweka mbingu mahali  
       pake;
- 20 kwa maarifa yake vilindi viligawanywa,  
       nayo mawingu yanadondosha umande.
- 21 Mwanangu, hifadhi maamuzi mema na  
       busara,  
       usiache vitoke machoni pako;
- 22 ndipo vitakapokuwa uzima nafsini mwako  
       na pambo la neema shingoni mwako.
- 23 Kisha utaenda katika njia yako salama,  
       wala mguu wako hautajikwaa;
- 24 ulalapo, hautaogopa;  
       ulalapo usingizi wako utakuwa mtamu.

- 25 Usiogope maafa ya ghafula  
au maangamizi yanayowapata waovu,  
26 kwa kuwa BWANA atakuwa tumaini lako  
na kuepusha mguu wako kunaswa katika  
mtego.
- 27 Usizue wema kwa wale wanaostahili  
ikiwa katika uwezo wako kutenda.  
28 Usimwambie jirani yako,  
“Njoo baadaye, nitakupa kesho”:  
wakati wewe unacho kitu kile karibu nawe.
- 29 Usifanye hila ya kumdhuru jirani yako,  
ambaye anaishi karibu na wewe  
akikuamini.  
30 Usimshtaki mtu bila sababu,  
wakati hajakutenda dhara lolote.
- 31 Usimwonee wivu mtu mwenye jeuri  
wala kuchagua njia yake iwayo yote,  
32 kwa kuwa BWANA humchukia mtu mpotovu,  
lakini siri yake iko kwa mwenye haki.
- 33 Laana ya BWANA i juu ya nyumba ya mwovu,  
lakini ye ye huibariki nyumba ya mwenye  
haki.  
34 Huwadhihaki wale wanaodhihaki,  
lakini huwapa neema wale wanyenyekevu.  
35 Wenye hekima hurithi heshima,  
bali huwaaibisha wapumbavu.

## 4

### *Hekima Ni Bora Kupita Vitu Vyote*

<sup>1</sup> Sikilizeni wanangu, mafundisho ya baba yenu;

- sikilizeni kwa makini na mpage ufahamu.
- <sup>2</sup> *Ninawapa mafundisho ya maana,  
kwa hiyo msyaache mafundisho yangu.*
- <sup>3</sup> *Nilipokuwa mvulana mdogo katika nyumba ya  
baba yangu,  
ningali mchanga na mtoto pekee kwa mama  
yangu,*
- <sup>4</sup> *baba alinifundisha akisema,  
“Yashike maneno yangu yote kwa moyo  
wako wote;  
yashike maagizo yangu na wewe utaishi.*
- <sup>5</sup> *Pata hekima, pata ufahamu;  
usiyasahau maneno yangu wala usiyaache.*
- <sup>6</sup> *Usimwache hekima naye atakuweka salama;  
mpende, naye atakulinda.*
- <sup>7</sup> *Hekima ni bora kuliko vitu vyote; kwa hiyo jipe  
hekima.  
Hata ikikugharimu vyote ulivyo navyo, pata  
ufahamu.*
- <sup>8</sup> *Mstahi, naye atakukweza;  
mkumbatie, naye atakuheshimu.*
- <sup>9</sup> *Atakuvika shada la neema kichwani mwako  
na kukupa taji ya utukufu.”*
- <sup>10</sup> *Sikiliza mwanangu, kubali ninachokuambia,  
nayo miaka ya maisha yako itakuwa mingi.*
- <sup>11</sup> *Ninakuongoza katika njia ya hekima  
na kukuongoza katika mapito yaliyonyooka.*
- <sup>12</sup> *Utembeapo, hatua zako hazitazuiliwa;  
ukimbiapo, hutajikwaa.*
- <sup>13</sup> *Mkamate sana elimu, usimwache aende zake;  
mshike, maana yeye ni uzima wako.*
- <sup>14</sup> *Usiuweke mguu wako katika njia ya waovu*

- wala usitembee katika njia ya watu wabaya.
- 15 Epukana nayo, usisafiri katika njia hiyo;  
achana nayo, na uelekee njia yako.
- 16 Kwa kuwa hawawezi kulala mpaka watende  
uovu;  
wanashindwa hata kusinzia mpaka  
wamwangushe mtu.
- 17 Wanakula mkate wa uovu,  
na kunywa mvinyo wa jeuri.
- 18 Njia ya wenye haki ni kama nuru ya kwanza  
ya mapambazuko,  
ambayo hung'aa zaidi na zaidi mpaka  
mchana mkamilifu.
- 19 Lakini njia ya waovu ni kama giza nene;  
hajui kinachowafanya wajikwae.
- 20 Mwanangu, yasikilize kwa makini yale ni-  
nayokuambia;  
sikiliza kwa makini maneno yangu.
- 21 Usiruhusu yaondoke machoni pako,  
yahifadhi ndani ya moyo wako;
- 22 kwa sababu ni uzima kwa wale wanaoyapata  
na afya kwa mwili wote wa mwanadamu.
- 23 Zaidi ya yote, linda moyo wako, kuliko yote  
uyalindayo,  
maana ndiko zitokako chemchemi za uzima.
- 24 Epusha kinywa chako na ukaidi;  
weka mazungumzo machafu mbali na  
midomo yako.
- 25 Macho yako na yatazame mbele,  
kaza macho yako moja kwa moja mbele  
yako.

- 26** Sawazisha mapito ya miguu yako  
na njia zako zote ziwe zimethibitika.  
**27** Usigeuke kulia wala kushoto;  
epusha mguu wako na ubaya.

## 5

### *Onyo Dhidi Ya Uzinzi*

- 1** Mwanangu, sikiliza kwa makini hekima yangu,  
sikiliza vizuri maneno yangu ya busara,  
**2** ili uweze kutunza busara  
na midomo yako ihifadhi maarifa.  
**3** Kwa maana midomo ya mwanamke kahaba  
hudondoza asali,  
na maneno ya kinywa chake  
ni laini kuliko mafuta;  
**4** lakini mwisho wake ni mchungu kama nyongo,  
mkali kama upanga ukatao kuwili.  
**5** Miguu yake hushuka kuelekea kwenye kifo;  
hatua zake huelekea moja kwa moja  
kaburini.\*  
**6** Yeye hafikiri juu ya njia ya uzima;  
njia zake zimepotoka, lakini yeye hajui.  
**7** Sasa basi wanangu, nisikilizeni;  
msiache ninalowaambia.  
**8** Njia zenu ziwe mbali naye,  
msiende karibu na mlango wa nyumba yake,  
**9** usije ukatoa nguvu zako nzuri kwa wengine  
na miaka yako kwa aliye mkatili,  
**10** wageni wasije wakasherehekeea utajiri wako  
na jitihada yako ikatajirisha

---

\* **5:5** Kaburini hapa maana yake ni Kuzimu, kwa Kiebrania ni Sheol.

- nyumba ya mwanaume mwingine.
- 11 Mwishoni mwa maisha yako utalia kwa uchungu,  
wakati nyama na mwili wako vimechakaa.
- 12 Utasema, "Tazama jinsi gani nilivyochukia adhabu!  
Tazama jinsi moyo wangu ulivyodharaau maonyo!"
- 13 Sikuwatii walimu wangu  
wala kuwasikiliza wakufunzi wangu.
- 14 Nimefika ukingoni mwa maangamizi kabisa  
katikati ya kusanyiko lote."
- 15 Kunywa maji kutoka kwenye kisima chako mwenyewe,  
maji yanayotiririka kutoka kwenye kisima chako mwenyewe.
- 16 Je, chemchemi zako zifurike katika barabara za mji  
na vijito vyako vyta maji viwanjani?
- 17 Na viwe vyako mwenyewe,  
kamwe visishirikishwe wageni.
- 18 Chemchemi yako na ibarikiwe  
na umfurahie mke wa ujana wako.
- 19 Kulungu jike apendaye, kulungu mzuri:  
matiti yake na yakutosheleze siku zote,  
nawe utekwe daima na upendo wake.
- 20 Kwa nini mwanangu, utekwe na mwanamke kahaba?  
Kwa nini ukumbatie kifua cha mke wa mwanaume mwingine?

- 21 Kwa maana njia za mtu ni wazi kabisa mbele za BWANA,  
naye huyapima mapito yake yote.
- 22 Matendo mabaya ya mtu mwovu humnasa  
yeye mwenyewe;  
kamba za dhambi yake humkamata kwa nguvu.
- 23 Atakufa kwa kukosa nidhamu,  
akipotoshwa kwa upumbavu wake  
mwenyewe.

## 6

### *Maonyo Dhidi Ya Upumbavu*

- 1 Mwanangu, kama umekuwa mdhamini wa jirani yako,  
ikiwa umeshika mikono kwa kuweka ahadi kwa ajili ya mwingine,
- 2 kama umetegwa na ulichosema,  
umenaswa kwa maneno ya kinywa chako,
- 3 basi fanya hivi mwanangu, ili ujiweke huru,  
kwa kuwa umeanguka mikononi mwa jirani yako:  
Nenda ukajinyenyekeshe kwake;  
msihi jirani yako!
- 4 Usiruhusu usingizi machoni pako,  
usiruhusu kope zako zisinzie.
- 5 Jiweke huru, kama swala mkononi mwa mwindaji,  
kama ndege kutoka kwenye mtego wa mwindaji.
- 6 Ewe mvivu, mwendee mchwa;  
zitafakari njia zake ukapate hekima!

- <sup>7</sup> Kwa maana ye ye hana msimamizi,  
wala mwangalizi, au mtawala,
- <sup>8</sup> lakini hujiwekea akiba wakati wa kiangazi  
na hukusanya chakula chake wakati wa  
mavuno.
- <sup>9</sup> Ewe mvivu, utalala hata lini?  
Utaamka lini kutoka usingizi wako?
- <sup>10</sup> Bado kulala kidogo, kusinzia kidogo,  
bado kukunja mikono kidogo upate  
kupumzika:
- <sup>11</sup> hivyo umaskini utakuja juu yako kama  
mnyang'anyi,  
na kupungukiwa kutakujia kama mtu  
mwenye silaha.
- <sup>12</sup> Mtu mbaya sana na mlaghai,  
ambaye huzungukazunguka  
na maneno ya upotovu,
- <sup>13</sup> ambaye anakonyeza kwa jicho lake,  
anayetoa ishara kwa miguu yake  
na kuashiria kwa vidole vyake,
- <sup>14</sup> ambaye hupanga ubaya  
kwa udanganyifu moyoni mwake:  
daima huchochea fitina.
- <sup>15</sup> Kwa hiyo maafa yatamkumba ghafula;  
ataangamizwa mara, pasipo msaada.
- <sup>16</sup> Kuna vitu sita anavyovichukia BWANA,  
naam, viko saba vilivyo chukizo kwake:  
<sup>17</sup> macho ya kiburi,  
ulimi udanganyao,  
mikono imwagayo damu isiyo na hatia,

<sup>18</sup> moyo uwazao mipango miovu,  
 miguu iliyo myepesi kukimbilia uovu,  
<sup>19</sup> shahidi wa uongo ambaye humwaga  
 uongo,  
 na mtu ambaye huchochea fitina kati ya  
 ndugu.

*Onyo Dhidi Ya Uasherati*

- <sup>20</sup> Mwanangu, zishike amri za baba yako,  
 wala usiyaache mafundisho ya mama yako.  
<sup>21</sup> Yafunge katika moyo wako daima,  
 yakaze kuizunguka shingo yako.  
<sup>22</sup> Wakati utembeapo, yatakuongoza;  
 wakati ulalapo, yatakulinda;  
 wakati uamkapo, yatazungumza nawe.  
<sup>23</sup> Kwa maana amri hizi ni taa,  
 mafundisho haya ni mwanga  
 na maonyo ya maadili ni njia ya uzima,  
<sup>24</sup> yakikulinda na mwanamke aliyepotoka,  
 kutokana na maneno laini ya mwanamke  
 aliyepotoka.  
<sup>25</sup> Moyo wako usitamani uzuri wake  
 wala macho yake yasikuteke,  
<sup>26</sup> kwa maana kahaba atakufanya uwe maskini,  
 hata ukose kipande cha mkate,  
 naye mwanamke mzinzi huwinda maisha  
 yako hasa.  
<sup>27</sup> Je, mtu aweza kuchotea moto kwenye paja lake  
 bila nguo zake kuungua?  
<sup>28</sup> Je, mtu aweza kutembea juu ya makaa ya moto  
 yanayowaka  
 bila miguu yake kuungua?

- 29 Ndivyo alivyo mtu alalaye na mke wa mwanaume mwingine;  
hakuna yejote amgusaye huyo mwanamke ambaye hataadhibiwa.
- 30 Watu hawamdharaau mwizi kama akiiba  
kukidhi njaa yake wakati ana njaa.
- 31 Pamoja na hayo, kama akikamatwa,  
lazima aliye mara saba,  
ingawa inamgharimu utajiri wote wa nyumba yake.
- 32 Lakini mwanaume aziniye na mwanamke  
hana akili kabisa;  
yejote afanyaye hivyo hujiangamiza  
mwenyewe.
- 33 Mapigo na aibu ni fungu lake  
na aibu yake haitafutika kamwe;
- 34 kwa maana wivu huamsha ghadhabu ya mume,  
naye hataonyesha huruma alipizapo kisasi.
- 35 Hatakubali fidia yoyote;  
atakataa malipo, hata yakiwa makubwa kiasi gani.

## 7

*Onyo Dhidi Ya Mwanamke Mzinzi*

- <sup>1</sup> Mwanangu, shika maneno yangu  
na kuzihifadhi amri zangu ndani yako.
- <sup>2</sup> Shika amri zangu nawe utaishi;  
linda mafundisho yangu kama mboni ya jicho lako.
- <sup>3</sup> Yafunge katika vidole vyako;  
yaandike katika kibao cha moyo wako.

- <sup>4</sup> Mwambie hekima, "Wewe ni dada yangu,"  
uite ufahamu jamaa yako;
- <sup>5</sup> watakuepusha na mwanamke mzinzi,  
kutokana na mwanamke mpotovu  
na maneno yake ya kubembeleza.
- <sup>6</sup> Kwenye dirisha la nyumba yangu  
nilitazama nje kupitia upenyo  
kwenye mwimo wa dirisha.
- <sup>7</sup> Niliona mionganoni mwa wajinga,  
nikagundua mionganoni mwa wanaume vi-  
jana,  
kijana asiye na akili.
- <sup>8</sup> Alikuwa akishuka njiani karibu na pembe ya  
kwake,  
akielekea kwenye nyumba ya huyo  
mwanamke
- <sup>9</sup> wakati wa machweo, juu likipungua nuru yake,  
giza la usiku lilipokuwa likiingia.
- <sup>10</sup> Ndipo huyo mwanamke akatoka kumlaki,  
hali amevaa kama kahaba akiwa na nia ya  
udanganyifu.
- <sup>11</sup> (Ni mwanamke mwenye makelele na mkaidi,  
miguu yake haitulii nyumbani;
- <sup>12</sup> mara kwenye barabara za mji,  
mara kwenye viwanja vikubwa,  
kwenye kila pembe huvizia.)
- <sup>13</sup> Huyo mwanamke alimkumbatia kijana na  
kumbusu,  
na kwa uso usio na haya akamwambia:
- <sup>14</sup> "Nina sadaka za amani nyumbani;

- leo nimetimiza nadhiri zangu.
- 15 Kwa hiyo nimetoka nje kukulaki;  
nimekutafuta na nimekupata!
- 16 Nimetandika kitanda changu  
kwa kitani za rangi kutoka Misri.
- 17 Nimetia manukato kitanda changu  
kwa manemane, udi na mdalasini.
- 18 Njoo, tuzame katika mapenzi mpaka asubuhi;  
tujifurahishe wenyewe kwa mapenzi!
- 19 Mume wangu hayupo nyumbani;  
amekwenda safari ya mbali.
- 20 Amechukua mkoba uliojazwa fedha  
na hatakuwepo nyumbani karibuni.”
- 21 Kwa maneno laini yule mwanamke akampoto-sha;  
alimshawishi kwa maneno yake laini.
- 22 Mara huyo kijana alimfuata yule mwanamke  
kama fahali aendaye machinjoni,  
kama kulungu aingiaye kwenye kitanzi,
- 23 mpaka mshale umchome ini lake,  
kama ndege anayenaswa kwenye mtego,  
bila kujua itamgharimu maisha yake.
- 24 Sasa basi wanangu, nisikilizeni;  
sikilizeni kwa makini nisemalo.
- 25 Usiruhusu moyo wako ugeukie njia za huyo  
mwanamke,  
wala usitagetange katika mapito yake.
- 26 Aliowaangusha ni wengi;  
aliowachinja ni kundi kubwa.

<sup>27</sup> Nyumba yake ni njia kuu iendayo kaburini,\*  
ielekeayo chini kwenye vyumba vya mauti.

## 8

### *Wito Wa Hekima*

- <sup>1</sup> Je, hekima haitani?  
Je, ufahamu hapazi sauti?
- <sup>2</sup> Juu ya miinuko karibu na njia,  
penye njia panda, ndipo asimamapo;
- <sup>3</sup> kando ya malango yaelekeayo mjini,  
kwenye maingilio, hulia kwa sauti kubwa,  
akisema:
- <sup>4</sup> “Ni ninyi wanaume, ninaowaita;  
ninapaza sauti yangu kwa wanadamu wote.
- <sup>5</sup> Ninyi ambao ni wajinga, pateni akili;  
ninyi mlion wapumbavu, pateni ufahamu.
- <sup>6</sup> Sikilizeni, kwa maana nina mambo muhimu ya  
kusema;  
ninafungua midomo yangu kusema lililo  
sawa.
- <sup>7</sup> Kinywa changu husema lililo kweli,  
kwa maana midomo yangu huchukia uovu.
- <sup>8</sup> Maneno yote ya kinywa changu ni haki;  
hakuna mojawapo lililopotoka wala ukaidi.
- <sup>9</sup> Kwa wenyе kupambanua yote ni sahihi;  
hayana kasoro kwa wale wenyе maarifa.
- <sup>10</sup> Chagua mafundisho yangu badala ya fedha,  
maarifa badala ya dhahabu safi,
- <sup>11</sup> kwa maana hekima ina thamani kuliko mari-  
jani

---

\* **7:27** Kaburini hapa maana yake ni Kuzimu, kwa Kiebrania ni Sheol.

na hakuna chochote unachohitaji kina-cholingana naye.

- 12 "Mimi hekima, nakaa pamoja na busara; ninamiliki maarifa na busara.
- 13 Kumcha BWANA ni kuchukia uovu; ninachukia kiburi na majivuno, tabia mbaya na mazungumzo potovu.
- 14 Ushauri na hukumu sahihi ni vyangu; nina ufahamu na nina nguvu.
- 15 Kwa msaada wangu wafalme hutawala na watawala hutunga sheria zilizo za haki,
- 16 kwa msaada wangu wakuu hutawala, na wenye vyeo wote watawalao dunia.
- 17 Nawapenda wale wanipendao, na wale wanitafutao kwa bidii wataniona.
- 18 Utajiri na heshima viko kwangu, utajiri udumuo na mafanikio.
- 19 Tunda langu ni bora kuliko dhahabu safi; kile nitoacho hupita fedha iliyo bora.
- 20 Natembea katika njia ya unyofu katika mapito ya haki,
- 21 nawapa utajiri wale wanipendao na kuzijaza hazina zao.
  
- 22 "BWANA aliniumba mwanzoni mwa kazi yake, kabla ya matendo yake ya zamani;
- 23 niliteuliwa tangu milele, tangu mwanzoni, kabla ya dunia kuumbwa.
- 24 Wakati hazijakuwepo bahari, nilikwishaza-liwa, wakati hazijakuwepo chemchemi zilizojaa maji;

- 25 kabla milima haijawekwa mahali pake,  
     kabla vilima havijakuwepo, nilikwishaza-  
     liwa,
- 26 kabla hajaumba dunia wala mashamba yake  
     au vumbi lolote la dunia.
- 27 Nilikuwepo alipoziweka mbingu mahali pake,  
     wakati alichora mstari wa upeo wa macho  
     juu ya uso wa kilindi,
- 28 wakati aliweka mawingu juu  
     na kuziweka imara chemchemi za bahari,
- 29 wakati aliiwekea bahari mpaka wake  
     ili maji yasivunje agizo lake,  
     na wakati aliweka misingi ya dunia.
- 30 Wakati huo nilikuwa fundi stadi kando  
     yake.
- Nilijazwa na furaha siku baada ya siku,  
     nikifurahi daima mbele zake,
- 31 nikifurahi katika dunia yake yote  
     nami nikiwfurahia wanadamu.
- 32 “Basi sasa wanangu, nisikilizeni;  
     heri wale wanaozishika njia zangu.
- 33 Sikilizeni mafundisho yangu mwe na hekima;  
     msiyapuuze.
- 34 Heri mtu yule anisikilizaye mimi,  
     akisubiri siku zote malangoni mwangu,  
     akingoja kwenye vizingiti vyta mlango  
     wangu.
- 35 Kwa maana yejote anipataye mimi amepata  
     uzima  
     na kujipatia kibali kutoka kwa BWANA.
- 36 Lakini yejote ashindwaye kunipata  
     hujiumpiza mwenyewe;  
     na wote wanichukiao mimi hupenda mauti.”

**9***Makaribisho Ya Hekima Na Ya Upumbavu*

- <sup>1</sup> Hekima amejenga nyumba yake;  
amechonga nguzo zake saba.
- <sup>2</sup> Ameandaa nyama na kuchanganya divai yake;  
pia ameandaa meza yake.
- <sup>3</sup> Amewatuma watumishi wake wa kike, naye  
huита  
kutoka mahali pa juu sana pa mji.
- <sup>4</sup> Anawaambia wale wasio na akili,  
“Wote ambao ni wajinga na waje hapa!
- <sup>5</sup> Njooni, mle chakula changu  
na mnywe divai niliyoichanganya.
- <sup>6</sup> Acheni njia zenu za ujinga nanyi mtaishi;  
tembeeni katika njia ya ufahamu.
- <sup>7</sup> “Yeyote anayemkosoa mwenye mzaha  
hukaribisha matukano;  
yeyote anayekemea mtu mwovu  
hupatwa na matusi.
- <sup>8</sup> Usimkemee mwenye mzaha la sivyo  
atakuchukia;  
mkemee mwenye hekima naye atakupenda.
- <sup>9</sup> Mfundishe mtu mwenye hekima  
naye atakuwa na hekima zaidi;  
mfundishe mtu mwadilifu  
naye atazidi kufundishika.
- <sup>10</sup> “Kumcha BWANA ndicho chanzo cha hekima,  
na kumjua Aliye Mtakatifu ni ufahamu.
- <sup>11</sup> Kwa maana kwa msaada wangu  
siku zako zitakuwa nyingi,  
na miaka itaongezwa katika maisha yako.

- <sup>12</sup> Kama wewe una hekima, hekima yako itakupa tuzo;  
 kama wewe ni mtu wa mzaha,  
 wewe mwenyewe ndiwe utateseka.”
- <sup>13</sup> Mwanamke aitwaye Mpumbavu ana kelele;  
 hana adabu na hana maarifa.
- <sup>14</sup> Huketi kwenye mlango wa nyumba yake,  
 juu ya kiti katika mahali pa juu sana pa mji,
- <sup>15</sup> akiita wale wapitao karibu,  
 waendao moja kwa moja kwenye njia yao.
- <sup>16</sup> Anawaambia wale wasio na akili,  
 “Wote ambaao ni wajinga na waje hapa ndani!”
- <sup>17</sup> “Maji yaliyoibowi ni matamu;  
 chakula kinacholiwa sirini ni kitamu!”
- <sup>18</sup> Lakini hawajui hata kidogo kuwa wafu wako humo,  
 kwamba wageni wake huyo mwanamke wako katika vilindi vya kuzimu.

## 10

### *Mithali Za Solomoni*

<sup>1</sup> Mithali za Solomoni:  
 Mwana mwenye hekima  
 huleta furaha kwa baba yake,  
 lakini mwana mpumbavu  
 huleta huzuni kwa mama yake.

- <sup>2</sup> Hazina zilizopatikana kwa njia mbaya hazifai,  
 lakini uadilifu huokoa kutoka mautini.
- <sup>3</sup> BWANA hawaachi waadilifu kukaa njaa,  
 lakini hupinga tamaa ya mtu mwovu.

- <sup>4</sup> Mikono mivivu hufanya mtu kuwa maskini  
lakini mikono yenyе bidii huleta utajiri.
- <sup>5</sup> Yeye akusanyaye mazao wakati wa kiangazi  
ni mwana mwenye hekima,  
lakini yeye alalaye wakati wa mavuno  
ni mwana mwenye kuaibisha.
- <sup>6</sup> Baraka huwa taji kichwani mwa mwenye haki,  
lakini jeuri hufunika kinywa cha mwovu.
- <sup>7</sup> Kumbukumbu ya mwenye haki itakuwa  
baraka,  
lakini jina la mwovu litaoza.
- <sup>8</sup> Mwenye hekima moyoni hupokea maagizo,  
lakini mpumbavu apayukaye huangamia.
- <sup>9</sup> Mtu mwadilifu hutembea salama,  
lakini mtu aendaye katika njia zilizopotoka  
atagunduliwa.
- <sup>10</sup> Yeye akonyezaye kwa nia mbaya husababisha  
huzuni,  
naye mpumbavu apayukaye huangamia.
- <sup>11</sup> Kinywa cha mwenye haki ni chemchemi ya  
uzima,  
lakini jeuri hufunika kinywa cha mwovu.
- <sup>12</sup> Chuki huchochea faraka,  
lakini upendo husitiri mabaya yote.

- 13** Hekima hupatikana katika midomo ya wenye kupambanua,  
lakini fimbo ni kwa ajili ya mgongo wake  
asiye na ufahamu.
- 14** Wenye hekima huhifadhi maarifa,  
bali kinywa cha mpumbavu hualika  
maangamizi.
- 15** Mali ya tajiri ni mji wake wenye ngome,  
bali ufukara ni maangamizi ya maskini.
- 16** Ujira wa wenye haki huwaletea uzima,  
lakini mapato ya waovu huwaletea adhabu.
- 17** Anayekubali kuadibishwa yuko katika njia ya  
uzima,  
lakini yejote anayepuuza maonyo hupo-  
sha wengine.
- 18** Yeye afichaye chuki yake ana midomo ya  
uongo,  
na yejote anayeeneza uchonganishi ni  
mpumbavu.
- 19** Wakati maneno ni mengi, dhambi  
haikosekani,  
lakini yejote ambaye huzuia ulimi wake ni  
mwenye busara.
- 20** Ulimi wa mwenye haki ni fedha iliyo bora,  
bali moyo wa mwovu una thamani ndogo.

- 21** Midomo ya mwenye haki hulisha wengi,  
lakini wapumbavu hufa kwa kukosa ufa-  
hamu.
- 22** Baraka ya BWANA hutajirisha,  
wala haichanganyi huzuni.
- 23** Mpumbavu hufurahia tabia mbaya,  
lakini mtu mwenye ufahamu hupendezwa  
na hekima.
- 24** Kile anachoogopa mwovu ndicho kitakachom-  
pata;  
kile anachoonea shauku mwenye haki at-  
apewa.
- 25** Tufani inapopita, waovu hutoweka,  
lakini wenye haki husimama imara milele.
- 26** Kama siki ilivyo kwa meno na moshi kwa  
macho,  
ndivyo alivyo mvivu kwa wale waliomtuma.
- 27** Kumcha BWANA huongeza urefu wa maisha,  
lakini miaka ya mwovu inafupishwa.
- 28** Tarajio la mwenye haki ni furaha,  
bali matumaini ya mwovu huwa si kitu.
- 29** Njia ya BWANA ni kimbilio kwa wenye haki,  
lakini ni maangamizi ya wale watendao  
mabaya.
- 30** Kamwe wenye haki hawataondolewa,

bali waovu hawatasalia katika nchi.

<sup>31</sup> Kinywa cha mwenye haki hutoa hekima,  
bali ulimi wa upotovu utakatwa.

<sup>32</sup> Midomo ya wenyе haki inajua kile kinachofaa,  
bali kinywa cha mwovu hujua kile kilichopoto-  
taka tu.

## 11

<sup>1</sup> BWANA huchukia sana mizani za udanganyifu,  
bali vipimo sahihi ni furaha yake.

<sup>2</sup> Kiburi kinapokuja, ndipo huja aibu,  
bali unyenyekevu huja na hekima.

<sup>3</sup> Uadilifu wa wenyе haki huwaongoza,  
bali wasio waaminifu huharibiwa na hila  
yao.

<sup>4</sup> Utajiri haufaidi kitu katika siku ya ghadhabu,  
bali haki huokoa kutoka mautini.

<sup>5</sup> Haki ya wasio na lawama, huwatengenezea njia  
iliyonyooka,  
bali waovu huangushwa kwa uovu wao  
wenyewe.

<sup>6</sup> Haki ya wanyofu huwaokoa,  
bali wasio waaminifu hunaswa na tamaa  
mbaya.

- <sup>7</sup> Wakati mtu mwovu anapokufa, matumaini yake hutoweka; yote aliyoyatazamia kutokana na nguvu zake huwa si kitu.
- <sup>8</sup> Mtu mwenye haki huokolewa kutoka taabu, naye mtu mwovu huingia humo badala yake.
- <sup>9</sup> Kwa kinywa chake mtu asiyemwamini Mungu humwangamiza jirani yake, bali kwa maarifa mwenye haki huokolewa.
- <sup>10</sup> Wakati mwenye haki anapofanikiwa, mji hufurahi; mwovu atowekapo, kuna kelele za furaha.
- <sup>11</sup> Kutokana na baraka ya mtu mnyofu mji hukwezwa, bali kwa kinywa cha mwovu mji huharibiwa.
- <sup>12</sup> Mtu asiye na akili humdharau jirani yake, bali mtu mwenye ufahamu huuzuia ulimi wake.
- <sup>13</sup> Masengenyo husaliti tumaini, bali mtu mwaminifu hutunza siri.
- <sup>14</sup> Pasipo ushauri wa hekima taifa huanguka, bali washauri wengi hufanya ushindi uwe wa hakika.
- <sup>15</sup> Yeye amdhaminkiye mgeni hakika atateseka,

bali    yejote    akataaye    kuunga    mkono  
dhamana ni salama.

<sup>16</sup> Mwanamke mwenye moyo wa huruma hupata  
      heshima,  
      bali wanaume wakorofi hupata mali tu.

<sup>17</sup> Mwenye huruma hujinufaisha mwenyewe,  
      bali mkatili hujiletea taabu mwenyewe.

<sup>18</sup> Mtu mwovu hupata ujira wa udanganyifu,  
      bali    yejye apandaye haki huvuna tuzo ya  
      uhakika.

<sup>19</sup> Mtu mwenye haki kweli kweli hupata uzima,  
      bali    yejye afuatiliaye ubaya huendea kifo  
      chake.

<sup>20</sup> BWANA huwachukia sana watu wenye moyo  
      wa upotovu,  
      bali hupendezwa na wale ambao njia zao  
      hazina lawama.

<sup>21</sup> Uwe na hakika na hili: Waovu hawataepuka  
      kuadhibiwa,  
      bali wenye haki watakuwa huru.

<sup>22</sup> Kama pete ya dhahabu katika pua ya nguruwe  
      ndivyo alivyo mwanamke mzuri ambaye  
      hana busara.

<sup>23</sup> Shauku ya mwenye haki huishia tu kwenye  
      mema,

bali tumaini la mwovu huishia tu kwenye  
ghadhabu.

- 24 Kuna mtu atoaye kwa ukarimu, hata hivyo  
hupata zaidi,  
mwingine huzuia, lakini huwa maskini.
- 25 Mtu mkarimu atastawi;  
yeye awaburudishaye wengine  
ataburudishwa mwenyewe.
- 26 Watu humlaani mtu awanyimae watu nafaka,  
bali baraka itamkalia kichwani kama taji  
yeye aliye radhi kuiuza.
- 27 Yeye atafutaye mema hupata ukarimu,  
bali ubaya huja kwake yeye autafutaye.
- 28 Yeyote ategemeaye utajiri wake ataanguka,  
bali mwenye haki atastawi kama jani bichi.
- 29 Yeye aletaye taabu kwa jamaa yake atarithi tu  
upepo,  
naye mpumbavu atakuwa mtumishi wa  
wenye hekima.
- 30 Tunda la mwenye haki ni mti wa uzima,  
naye mwenye hekima huvuta roho za watu.
- 31 Kama wenye haki watapokea ujira wao duni-  
ani,  
si zaidi sana yule asiyemcha Mungu na  
mwenye dhambi?

## 12

*Mafundisho Ya Kifamilia Na Ya Kijamii*

- <sup>1</sup> Yeyote apendaye kuadibishwa hupenda maar-ifaa,  
bali ye ye achukiaye kuonywa ni mpumbavu.
- <sup>2</sup> Mtu mwema hupata kibali kutoka kwa BWANA,  
bali BWANA humhukumu mwenye hila.
- <sup>3</sup> Mtu hathibitiki kutokana na uovu,  
bali mwenye haki hataondolewa.
- <sup>4</sup> Mke mwenye tabia nzuri ni taji ya mumewe,  
bali aaibishaye ni kama uozo  
katika mifupa ya mumewe.
- <sup>5</sup> Mipango ya mtu mwadilifu ni ya haki,  
bali ushauri wa mwovu ni udanganyifu.
- <sup>6</sup> Maneno ya waovu huotea kumwaga damu,  
bali maneno ya waadilifu huwaokoa.
- <sup>7</sup> Watu waovu huondolewa na kutoweka,  
bali nyumba ya mwenye haki husimama  
imara.
- <sup>8</sup> Mtu husifiwa kulingana na hekima yake,  
bali watu wenyе akili zilizopotoka hudhrauliwa.
- <sup>9</sup> Heri mtu wa hali ya chini mwenye mtumishi,  
kuliko kujifanya mtu wa hali ya juu nawe  
huna chakula.

- <sup>10</sup> Mtu mwenye haki hujali mahitaji ya mnyama wake,  
bali matendo ya huruma ya mwovu ni ukatili.
- <sup>11</sup> Yeye alimaye shamba lake atakuwa na chakula tele,  
bali yeye afuataye mambo ya upuzi hana akili.
- <sup>12</sup> Waovu hutamani mateka ya watu wabaya,  
bali shina la mwenye haki hustawi.
- <sup>13</sup> Mtu mwovu hunaswa kwa mazungumzo yake ya dhambi,  
bali mwenye haki huepuka taabu.
- <sup>14</sup> Kutokana na tunda la midomo yake mtu hujazwa na mambo mema,  
hakika kama ilivyo kazi ya mikono yake humtunza.
- <sup>15</sup> Njia ya mpumbavu huonekana sawa machoni pake mwenyewe,  
bali mtu mwenye hekima husikiliza ushauri.
- <sup>16</sup> Mpumbavu huonyesha kuudhika kwake mara moja,  
bali mtu wa busara hupuuza matukano.
- <sup>17</sup> Shahidi wa kweli hutoa ushuhuda wa kuaminika,  
bali shahidi wa uongo husema uongo.

- 18 Maneno ya kipumbavu huchoma kama up-  
anga,  
bali ulimi wa mwenye hekima huleta up-  
onyaji.
- 19 Midomo isemayo kweli hudumu milele,  
bali ulimi wa uongo hudumu kwa muda  
mfupi tu.
- 20 Upo udanganyifu katika mioyo  
ya wale ambao hupanga mabaya,  
bali kuna furaha kwa wale wanaoleta  
amani.
- 21 Hakuna dhara linalompata mwenye haki,  
bali waovu wana taabu nyingi.
- 22 BWANA anachukia sana midomo idanganyayo,  
bali hufurahia watu ambao ni wa kweli.
- 23 Mtu mwenye busara hujihifadhia maarifa yeye  
mwenyewe,  
bali moyo wa wapumbavu hububujika up-  
umbavu.
- 24 Mikono yenye bidii itatawala,  
bali uvivu huishia katika kazi za utumwa.
- 25 Moyo wa wasiwasi humlemea mtu,  
bali neno la huruma humfurahisha.
- 26 Mtu mwenye haki ni mwangalifu katika  
urafiki,  
bali njia ya waovu huwapotosha.

- <sup>27</sup> Mtu mvivu haoki mawindo yake,  
bali mtu mwenye bidii ana mali za thamani.
- <sup>28</sup> Katika njia ya haki kuna uzima;  
katika mapito hayo kuna maisha ya milele.

## 13

### *Mema Ya Muda Mfupi Na Yale Ya Kudumu*

- <sup>1</sup> Mwana mwenye hekima husikia mafundisho  
ya babaye,  
bali mwenye dharau hasikilizi maonyo.
- <sup>2</sup> Kutoka tunda la midomo yake mtu hufurahia  
mambo mema,  
bali wasio waaminifu wanatamani sana  
jeuri.
- <sup>3</sup> Yeye alindaye midomo yake hulinda nafsi yake,  
bali yeye asemaye kwa haraka ataangamia.
- <sup>4</sup> Mvivu hutamani sana na hapati kitu,  
bali nafsi ya mwenye bidii  
hutoshelezwa kikamilifu.
- <sup>5</sup> Mwenye haki huchukia uongo,  
bali waovu huleta aibu na fedheha.
- <sup>6</sup> Haki humlinda mtu mwadilifu,  
bali uovu humwangusha mwenye dhambi.
- <sup>7</sup> Mtu mmoja hujifanya tajiri, kumbe hana cho-  
chote;

mwingine hujifanya maskini, kumbe ana utajiri  
mwingi.

<sup>8</sup> Utajiri wa mtu waweza kukomboa maisha yake,  
bali mtu maskini hasikii kitisho.

<sup>9</sup> Nuru ya mwenye haki hung'aa sana,  
bali taa ya mwovu itazimwa.

<sup>10</sup> Kiburi huzalisha magomvi tu,  
bali hekima hupatikana kwa wale wanaozin-gatia ushauri.

<sup>11</sup> Fedha isiyo ya halali hupungua,  
bali yeye akusanyaye fedha kidogo kidogo  
huongezeka.

<sup>12</sup> Kilichotarajiwa kikikawia kuja moyo huugua,  
bali tumaini lililotimizwa ni mti wa uzima.

<sup>13</sup> Yeye anayedharau mafundisho anajiletea  
maangamizi,  
bali yeye anayeheshimu agizo hupewa tuzo.

<sup>14</sup> Mafundisho ya mwenye busara ni chemchemi  
ya uzima,  
ili kumwepusha mtu na mitego ya mauti.

<sup>15</sup> Ufahamu mzuri hupata upendeleo,  
bali njia ya asiye mwaminifu ni ngumu.

<sup>16</sup> Kila mwenye busara hutenda kwa maarifa,

bali mpumbavu hudhihirisha upumbavu  
wake.

- 17 Mjumbe mwovu huanguka kwenye taabu,  
bali mjambe mwaminifu huleta uponyaji.
- 18 Yeye anayedharau maonyo hupata umaskini  
na aibu,  
bali yeye anayekubali maonyo  
huheshimiwa.
- 19 Tarajio lililotimizwa ni tamu kwa nafsi,  
bali wapumbavu huchukia sana kuacha  
ubaya.
- 20 Yeye atembeaye na mwenye hekima atapata  
hekima,  
bali rafiki wa mpumbavu hupata madhara.
- 21 Balaa humwandama mtenda dhambi,  
bali mafanikio ni thawabu kwa mwenye  
haki.
- 22 Mtu mwema huwaachia wana wa wanawe  
urithi,  
bali mali ya wenye dhambi imehifadhiwa  
kwa ajili ya wenye haki.
- 23 Shamba la mtu maskini laweza kuzalisha  
chakula kingi,  
bali dhuluma hukifutilia mbali.
- 24 Yeye aizuiaye fimbo yake hampendi  
mwanawe,

bali ye ye ampendaye  
huwa mwangalifu kumwadibisha.

- <sup>25</sup> Mwenye haki hula mpaka akaridhisha moyo wake,  
bali tumbo la mwovu hutaabika kwa njaa.

## 14

<sup>1</sup> Mwanamke mwenye hekima huijenga nyumba yake,  
bali mpumbavu huibomoa nyumba yake kwa mikono yake mwenyewe.

<sup>2</sup> Yeye ambaye njia zake ni nyofu humcha BWANA,  
bali ye ye ambaye njia zake zimepotoka humdharau Mungu.

<sup>3</sup> Mazungumzo ya mpumbavu huleta fimbo mgongoni mwake,  
bali mwenye hekima hulindwa na maneno ya midomo yake.

<sup>4</sup> Pale ambapo hakuna mafahali, hori ni tupu,  
bali kutokana na nguvu za fahali huja mavuno mengi.

<sup>5</sup> Shahidi mwaminifu hadanganyi,  
bali shahidi wa uongo humimina uongo.

<sup>6</sup> Mwenye mzaha huitafuta hekima na haipati,  
bali maarifa huja kwa urahisi kwa anayepambanua.

- <sup>7</sup> Kaa mbali na mtu mpumbavu,  
     kwa maana hutapata maarifa katika  
     midomo yake.
- <sup>8</sup> Hekima ya mwenye busara ni kufikiria njia  
     zake,  
     bali upumbavu wa wapumbavu ni udan-  
     ganyifu.
- <sup>9</sup> Wapumbavu hudhihaki kujirekebisha kutoka  
     dhambi,  
     bali wema hupatikana mionganoni mwa wany-  
     ofu.
- <sup>10</sup> Kila moyo hujua uchungu wake wenyewe,  
     wala hakuna yejote awezaye kushiriki fu-  
     raha yake.
- <sup>11</sup> Nyumba ya mwovu itaangamizwa,  
     bali hema la mnyofu litastawi.
- <sup>12</sup> Iko njia ionekanayo kuwa sawa kwa mtu,  
     bali mwisho wake huelekeza mautini.
- <sup>13</sup> Hata katika kicheko moyo waweza kuuma,  
     nayo furaha yaweza kuishia katika majonzi.
- <sup>14</sup> Wasio na imani watapatilizwa kikamilifu kwa  
     ajili ya njia zao,  
     naye mtu mwema atapewa thawabu kwa  
     ajili ya njia yake.
- <sup>15</sup> Mtu mjinga huamini kila kitu,

bali mwenye busara hufikiria hatua zake.

- 16 Mtu mwenye hekima humcha BWANA na  
kuepuka mabaya,  
bali mpumbavu hukasirika kwa hamaki na  
uzembe.
- 17 Mtu anayekasirika kwa haraka hufanya  
mambo ya upumbavu,  
naye mtu wa hila huchukiwa.
- 18 Mjinga hurithi upumbavu,  
bali wenyе busara huvikwa maarifa kich-  
wani kama taji.
- 19 Watu wabaya watasujudu mbele ya watu  
wema,  
nao waovu kwenye malango ya wenyе haki.
- 20 Maskini huepukwa hata na majirani zao,  
bali matajiri wana marafiki wengi.
- 21 Yeye anayemdharau jirani yake hutenda  
dhambi,  
bali amebarikiwa yeye aliye na huruma kwa  
mhitaji.
- 22 Je, wale wanaopanga ubaya hawapotoki?  
Bali wale wanaopanga kilicho chema  
hupata upendo na uaminifu.
- 23 Kazi zote zinazofanywa kwa bidii huleta faida,

bali mazungumzo matupu huelekea umaskini tu.

24 Utajiri wa wenyе hekima ni taji yao,  
bali upumbavu wa wapumbavu huzaa upumbavu.

25 Shahidi wa kweli huokoa maisha,  
bali shahidi wa uongo ni mdanganyifu.

26 Yeye amchaye BWANA ana ngome salama,  
na kwa watoto wake itakuwa kimbilio.

27 Kumcha BWANA ni chemchemi ya uzima,  
ili kumwepusha mtu na mitego ya mauti.

28 Wingi wa watu ni utukufu wa mfalme,  
bali pasipo watu mkuu huangamia.

29 Mtu mwenye subira ana ufahamu mwingi,  
bali anayekasirika haraka huonyesha upumbavu.

30 Moyo wenyе amani huupa mwili uzima,  
bali wivu huozesha mifupa.

31 Yeye amwoneaye maskini huonyesha dharaу  
kwa Muumba wao,  
bali ye yote anayemhurumia mhitaji  
humheshimu Mungu.

32 Waovu huangamizwa kwa matendo yao  
maovu,

bali hata katika kifo wenye haki hupata  
kimbilio.

<sup>33</sup> Hekima hukaa katika moyo wa mwenye ufa-  
hamu  
bali haijulikani miongoni mwa wapumbavu.

<sup>34</sup> Haki huinua taifa,  
bali dhambi ni aibu kwa watu wote.

<sup>35</sup> Mfalme hupendezwa na mtumishi mwenye  
hekima,  
bali ghadhabu yake humwangukia  
mtumishi mwenye kuaibisha.

## 15

<sup>1</sup> Jawabu la upole hugeuza ghadhabu,  
bali neno liumizalo huchochea hasira.

<sup>2</sup> Ulimi wa mwenye hekima husifu maarifa,  
bali kinywa cha mpumbavu hufoka upum-  
bavu.

<sup>3</sup> Macho ya BWANA yako kila mahali,  
yakiwaangalia waovu na wema.

<sup>4</sup> Ulimi uletaao uponyaji ni mti wa uzima,  
bali ulimi udanganyao huponda roho.

<sup>5</sup> Mpumbavu hubeza maonyo ya baba yake,  
bali yejote akubaliye maonyo huonyesha  
busara.

- <sup>6</sup> Nyumba ya mwenye haki ina hazina kubwa,  
bali mapato ya waovu huwaletea taabu.
- <sup>7</sup> Midomo ya mwenye hekima hueneza maarifa,  
bali sivyo ilivyo mioyo ya wapumbavu.
- <sup>8</sup> BWANA huchukia sana dhabihu za waovu,  
bali maombi ya wanyofu humfurahisha  
Mungu.
- <sup>9</sup> BWANA huchukia sana njia ya waovu,  
bali huwapenda wale wafuatao haki.
- <sup>10</sup> Adhabu kali humngoja yeye aachaye njia;  
yeye achukiaye maonyo atakufa.
- <sup>11</sup> Mauti\* na Uharibifu<sup>†</sup> viko wazi mbele za  
BWANA:  
je, si zaidi sana mioyo ya wanadamu!
- <sup>12</sup> Mwenye mzaha huchukia maonyo;  
hatataka shauri kwa mwenye hekima.
- <sup>13</sup> Moyo wenyе furaha hufanya uso uchangamke,  
bali maumivu ya moyoni huponda roho.
- <sup>14</sup> Moyo wa mwenye ufahamu hutafuta maarifa,  
bali kinywa cha mpumbavu hujilisha upum-  
bavu.
- <sup>15</sup> Siku zote za wanaoonewa ni za taabu,

---

\* **15:11** Yaani Sheol, maana yake ni Kuzimu.    † **15:11** Kwa  
Kiebrania ni Abadon.

bali moyo mchangamfu una karamu ya kudumu.

<sup>16</sup> Afadhali kuwa na kidogo pamoja na kumcha BWANA,  
kuliko mali nyingi pamoja na ghasia.

<sup>17</sup> Afadhali chakula cha mboga mahali palipo na upendo  
kuliko nyama ya ndama iliyonona pamoja na chuki.

<sup>18</sup> Mtu mwepesi wa hasira huchochea ugomvi,  
bali mtu mvumilivu hutuliza ugomvi.

<sup>19</sup> Njia ya mvivu imezibwa na miiba,  
bali njia ya mwenye haki ni barabara kuu.

<sup>20</sup> Mwana mwenye hekima huleta furaha kwa baba yake,  
bali mtu mpumbavu humdharau mama yake.

<sup>21</sup> Upumbavu humfurahisha mtu ambaye hana akili,  
bali mtu mwenye ufahamu hushika njia iliyonyooka.

<sup>22</sup> Mipango hushindwa kufanikiwa kwa ajili ya kukosa ushauri,  
bali kukiwa na washauri wengi hufanikiwa.

<sup>23</sup> Mtu hupata furaha katika kutoa jibu linalofaa:

je, ni zuri namna gani neno lililotoka kwa  
wakati wake!

- 24 Mapito ya uzima huelekea juu kwa ajili ya  
wenye hekima  
kumwepusha asiende chini kaburini.
- 25 BWANA hubomoa nyumba ya mtu mwenye  
kiburi,  
bali huilinda mipaka ya mjane isiguswe.
- 26 BWANA huchukia sana mawazo ya mwovu,  
bali mawazo ya wale walio safi humfu-  
rahisha yeeye.
- 27 Mtu mwenye tamaa huletea jamaa yake taabu,  
bali yeeye achukiaye rushwa ataishi.
- 28 Moyo wa mwenye haki hupima majibu yake,  
bali kinywa cha mwovu hufoka ubaya.
- 29 BWANA yuko mbali na waovu,  
bali husikia maombi ya wenye haki.
- 30 Mtazamo wa tabasamu huleta furaha moyoni,  
nazo habari njema huipa mifupa afya.
- 31 Yeye asikilizaye maonyo yatoayo uzima  
atakuwa mionganoni mwa wenye hekima.
- 32 Yeye anayedharau maonyo hujidharau  
mwenyewe,

bali yejote anayekubali maonyo hupata ufa-hamu.

**33** Kumcha BWANA humfundisha mtu hekima,  
nao unyenyekevu huja kabla ya heshima.

## 16

**1** Mipango ya moyoni ni ya mwanadamu,  
bali jibu la ulimi hutoka kwa BWANA.

**2** Njia zote za mtu huonekana safi machoni pake  
mwenyewe,  
bali makusudi hupimwa na BWANA.

**3** Mkabidhi BWANA lolote ufanyalo,  
nayo mipango yako itafanikiwa.

**4** BWANA hufanya kila kitu kwa kusudi lake  
mwenyewe;  
hata waovu kwa siku ya maangamizi.

**5** BWANA huwachukia sana wote wenye kiburi  
cha moyo.  
Uwe na hakika kwa hili: Hawataepuka  
kuadhibiwa.

**6** Kwa upendo na uaminifu uovu huondolewa;  
kwa kumcha BWANA mtu hujiepusha na  
ubaya.

**7** Njia za mtu zinapompendeza BWANA,  
huwafanya hata adui zake waishi naye kwa  
amanii.

- <sup>8</sup> Afadhali kitu kidogo pamoja na haki  
kuliko mapato mengi pamoja na udhalimu.
- <sup>9</sup> Moyo wa mtu huifikiri njia yake,  
bali BWANA huelekeza hatua zake.
- <sup>10</sup> Midomo ya mfalme huzungumza kwa hekima  
ya kiungu,  
wala kinywa chake hakipotoshi haki.
- <sup>11</sup> Vipimo na mizani za halali hutoka kwa BWANA;  
mawe yote ya kupimia yaliyo katika mfuko  
ameyafanya yeye.
- <sup>12</sup> Wafalme huchukia sana kutenda maovu,  
kwa maana kitu cha ufalme hufanywa imara  
kwa njia ya haki.
- <sup>13</sup> Wafalme hufurahia midomo ya uaminifu;  
humthamini mtu asemaye kweli.
- <sup>14</sup> Ghadhabu ya mfalme ni mjumbe wa mauti,  
bali mtu mwenye hekima ataituliza.
- <sup>15</sup> Uso wa mfalme ung'aapo, inamaanisha uhai;  
upendeleo wake ni kama wingu la mvua  
wakati wa vuli.
- <sup>16</sup> Ni bora kiasi gani kupata hekima kuliko  
dhahabu,  
kuchagua ufahamu kuliko fedha!
- <sup>17</sup> Njia kuu ya wanyofu huepuka ubaya;

ye ye aichungaye njia yake, huchunga  
maisha yake.

- 18 Kiburi hutangulia maangamizi,  
roho ya majivuno hutangulia maanguko.
- 19 Ni afadhali kuwa mnyenyeketu katika roho  
miongoni mwa walioonewa  
kuliko kugawana nyara pamoja na wenyewe  
kiburi.
- 20 Yeyote anayekubali mafundisho hustawi,  
tena amebarikiwa ye ye anayemtumaini  
BWANA.
- 21 Wenyewe hekima moyoni huitwa wenyewe ufa-  
hamu,  
na maneno ya kupendeza huchochea ma-  
fundisho.
- 22 Ufahamu ni chemchemi ya uzima kwa wale  
walio nao,  
bali upumbavu huleta adhabu kwa wapum-  
bavu.
- 23 Moyo wa mtu mwenye hekima huongoza  
kinywa chake,  
na midomo yake huchochea mafundisho.
- 24 Maneno ya kupendeza ni kama sega la asali,  
ni matamu kwa nafsi na uponyaji kwenye  
mifupa.
- 25 Iko njia ionekanayo kuwa sawa kwa mtu,

bali mwisho wake huelekeza mautini.

- <sup>26</sup> Shauku ya mfanyakazi humhimiza kufanya  
kazi;  
njaa yake humsukuma aendelee.
- <sup>27</sup> Mtu mbaya kabisa hupanga mabaya,  
maneno yake ni kama moto uunguzao.
- <sup>28</sup> Mtu mpotovu huchochea ugomvi,  
nayo maongezi ya upuzi hutenganisha  
marafiki wa karibu.
- <sup>29</sup> Mtu mkali humvuta jirani yake  
na kumwongoza katika mapito yale mabaya.
- <sup>30</sup> Yeye akonyezaye kwa jicho lake anapanga  
upotovu;  
naye akazaye midomo yake amenuia  
mabaya.
- <sup>31</sup> Mvi ni taji ya utukufu;  
hupatikana kwa maisha ya uadilifu.
- <sup>32</sup> Ni afadhali mtu mstahimilivu kuliko shujaa,  
mtu anayeitawala hasira yake kuliko yule  
autekaye mji.
- <sup>33</sup> Kura hupigwa kwa siri,  
lakini kila uamuzi wake hutoka kwa BWANA.

**17**

- <sup>1</sup> Afadhali kula ukoko mkavu ukiwa na amani na  
utulivu  
kuliko kukaa kwenye nyumba ya karamu  
kukiwa na magomvi.
- <sup>2</sup> Mtumishi mwenye hekima atatawala juu ya  
mwana aaibishaye,  
naye atashirikiana katika urithi kama  
mmoja wa hao ndugu.
- <sup>3</sup> Kalibu ni kwa ajili ya fedha na tanuru ni kwa  
ajili ya dhahabu,  
bali BWANA huujaribu moyo.
- <sup>4</sup> Mtu mwovu husikiliza midomo mibaya;  
mwongo husikiliza kwa makini ulimi wa  
madhara.
- <sup>5</sup> Yeye anaye mdhihaki maskini huonyesha dha-  
rau kwa Muumba wake;  
ye yote afurahiaye maafa hataepuka kuad-  
hibiwa.
- <sup>6</sup> Wana wa wana ni taji la wazee,  
nao wazazi ni fahari ya watoto wao.
- <sup>7</sup> Midomo yenye uwezo wa ushawishi haimfai  
mpumbavu:  
je, ni mibaya kiasi gani zaidi midomo ya  
uongo kwa mtawala!
- <sup>8</sup> Kipawa ni kama kito cha thamani machoni  
pake yeye aliye nacho;

kokote kigeukiapo, hufanikiwa.

<sup>9</sup> Yeye anayesamehe kosa hudumisha upendo,  
bali yeote arudiaye jambo hutenganisha  
marafiki wa karibu.

<sup>10</sup> Karipio humwingia sana mtu mwenye kutam-  
bua  
kuliko mapigo mia kwa mpumbavu.

<sup>11</sup> Mtu mbaya hupenda kuasi tu;  
mjumbe asiye na huruma atatumwa dhidi  
yake.

<sup>12</sup> Ni afadhali ukutane na dubu  
aliyenyang'anywa watoto wake,  
kuliko mpumbavu katika upumbavu wake.

<sup>13</sup> Ikiwa mtu atalipa baya kwa jema,  
kamwe ubaya hautaondoka katika nyumba  
yake.

<sup>14</sup> Kuanzisha ugomvi ni kama kutoboa bwawa la  
maji;  
kwa hiyo acha jambo hilo kabla mabishano  
hayajaanza.

<sup>15</sup> Yeye asemaye kuwa asiye na haki ana haki,  
naye asemaye kuwa mwenye haki hana  
haki:  
BWANA huwachukia sana wote wawili.

<sup>16</sup> Fedha ina faida gani mikononi mwa mpum-  
bavu,

wakati yeye hana haja ya kupata hekima?

- 17 Rafiki hupenda wakati wote  
naye ndugu amezaliwa kwa ajili ya wakati  
wa shida.
- 18 Mtu mjinga hupana mkono ili kuweka rehani,  
naye huweka dhamana kwa jirani yake.
- 19 Yeye apendaye ugomvi apenda dhambi;  
naye ainuaye sana lango lake\* hutafuta  
uharibifu.
- 20 Mtu mwenye moyo mpotovu hawesi ku-  
fanikiwa;  
naye ambaye ulimi wake ni mdanganyifu  
huanguka kwenye taabu.
- 21 Kuwa na mwana mpumbavu huleta huzuni;  
hakuna furaha kwa baba wa mpumbavu.
- 22 Moyo wenyе furaha ni dawa nzuri,  
bali roho iliyopondeka hukausha mifupa.
- 23 Mtu mwovu hukubali rushwa kwa siri  
ili kupotosha njia ya haki.
- 24 Mtu wa ufahamu huitazama hekima,  
lakini macho ya mpumbavu huhangaika  
hadi kwenye miisho ya dunia.

---

\* **17:19** Kuinua lango maana yake ni kusema kwa majivuno.

- 25** Mwana mpumbavu huleta huzuni kwa baba  
yake  
na uchungu kwa yeze aliyemzaa.
- 26** Si vizuri kumwadhibu mtu asiye na hatia,  
au kuwapiga sana maafisa kwa ajili ya  
uadilifu wao.
- 27** Mtu mwenye maarifa hutumia maneno kwa  
kujizuia,  
naye mtu mwenye ufahamu ana moyo wa  
utulivu.
- 28** Hata mtu mpumbavu hudhaniwa kuwa na  
hekima kama akinyamaza,  
na mwenye ufahamu kama akiuzuia ulimi  
wake.

## 18

- 1** Mtu ajitengaye na wengine  
hufuata matakwa yake mwenyewe;  
hupiga vita kila shauri jema.
- 2** Mpumbavu hafurahii ufahamu,  
bali hufurahia kutangaza  
maoni yake mwenyewe.
- 3** Wakati uovu unapokuja, dhara uhuja pia,  
pamoja na aibu uhuja lawama.
- 4** Maneno ya kinywa cha mwanadamu ni kina  
cha maji,

bali chemchemi ya hekima ni kijito kina-chobubujika.

- 5** Sio vizuri kumpendelea mtu mwovu,  
au kumnyima haki asiye na hatia.
- 6** Midomo ya mpumbavu humletea ugomvi  
na kinywa chake hualika kipigo.
- 7** Kinywa cha mpumbavu ni uharibifu wake  
na midomo yake ni mtego kwa nafsi yake.
- 8** Maneno ya mchongezi ni kama chakula kitamu;  
huingia sehemu za ndani sana za mtu.
- 9** Mtu aliye mlegevu katika kazi yake  
ni ndugu na yule anayeharibu.
- 10** Jina la BWANA ni ngome imara,  
wenye haki huikimbilia na kuwa salama.
- 11** Mali ya tajiri ni mji wake wenye ngome,  
wanaudhania kuwa ukuta usioweza ku-rukwa.
- 12** Kabla ya anguko moyo wa mtu hujaa kiburi,  
bali unyenyekevu hutangulia heshima.
- 13** Yeye ajibuye kabla ya kusikiliza,  
huo ni upumbavu wake na aibu yake.
- 14** Roho ya mtu itastahimili katika ugonjwa

bali roho iliyovunjika ni nani awezaye kuis-tahimili?

<sup>15</sup> Moyo wa mwenye ufahamu hujipatia maarifa, masikio ya mwenye hekima huyatafuta maarifa.

<sup>16</sup> Zawadi humfungulia njia mtoaji, nayo humleta mbele ya wakuu.

<sup>17</sup> Yeye aliye wa kwanza kuleta mashtaka huonekana sahihi, hadi mwagine ajitokezapo na kumuuliza maswali.

<sup>18</sup> Kupiga kura hukomesha mashindano na kutenganisha wapinzani wakuu wanaopingana.

<sup>19</sup> Ndugu aliyechukizwa ni mgumu kuridhika kuliko mji uliozungushiwa ngome, nayo mabishano ni kama malango ya ngome yenye makomeo.

<sup>20</sup> Tumbo la mtu litajaa kutokana na tunda la kinywa chake, atashibishwa mavuno yanayotokana na midomo yake.

<sup>21</sup> Mauti na uzima viko katika uwezo wa ulimi, nao waupenda watakula matunda yake.

<sup>22</sup> Apataye mke apata kitu chema naye ajipatia kibali kwa BWANA.

- 23** Mtu maskini huomba kuhurumiwa  
bali tajiri hujibu kwa ukali.
- 24** Mtu mwenye marafiki wengi wanaweza  
kumharibu,  
bali yuko rafiki aambatanaye na mtu kwa  
karibu kuliko ndugu.

## 19

- 1** Afadhali mtu maskini ambaye mwenendo wake  
hauna lawama,  
kuliko mpumbavu ambaye midomo yake  
imepotoka.
- 2** Sio vizuri kuwa na juhudhi bila maarifa,  
wala kufanya haraka na kuikosa njia.
- 3** Upumbavu wa mtu mwenyewe huharibu  
maisha yake  
hata hivyo moyo wake humkasirikia BWANA.
- 4** Mali huleta marafiki wengi,  
bali rafiki wa mtu maskini humwacha.
- 5** Shahidi wa uongo hataacha kuadhibiwa,  
naye amwagaye uongo hataachwa huru.
- 6** Wengi hujipendekeza kwa mtawala  
na kila mmoja ni rafiki wa mtu atoaye  
zawadi.
- 7** Mtu maskini huepukwa na ndugu zake wote:  
Je, marafiki zake watamkwepa kiasi gani!

Ingawa huwafuata kwa kuwasihii,  
hawapatikani popote.

- 8 Yeye apataye hekima huipenda nafsi yake  
mwenyewe,  
yeye ahifadhiye ufahamu hustawi.
- 9 Shahidi wa uongo hataacha kuadhibiwa,  
naye amwagaye uongo ataangamia.
- 10 Haistahili mpumbavu kuishi katika anasa,  
itakuwa vibaya kiasi gani  
kwa mtumwa kuwatawala wakuu.
- 11 Hekima ya mtu humpa uvumilivu,  
ni kwa utukufu wake kusamehe makosa.
- 12 Ghadhabu ya mfalme ni kama mngurumo wa  
simba,  
bali wema wake ni kama umande juu ya  
nyasi.
- 13 Mwana mpumbavu ni maangamizi ya babaye,  
naye mke mgomvi ni kama kutonatona  
kusikoisha.
- 14 Nyumba na mali hurithiwa kutoka kwa  
wazazi,  
bali mke mwenye busara hutoka kwa  
BWANA.
- 15 Uvivu huleta usingizi mzito,  
naye mtu mzembe huona njaa.

- 16** Yeye ambaye hutii mafundisho huulinda uhai wake,  
bali ye ye anayezidharau njia zake atakufa.
- 17** Yeye amhurumiaye maskini humkopesha  
BWANA,  
naye atamtuza kwa aliyatenda.
- 18** Mrudi mwanaao, kwa maana katika hiyo kuna  
tumaini,  
usiwe mshirika katika mauti yake.
- 19** Mtu mwenye kukasirika haraka ni lazima  
atapata adhabu yake,  
kama utamwokoa, itakubidi kufanya hivyo  
tena.
- 20** Sikiliza mashauri na ukubali mafundisho,  
nawe mwishoni utakuwa na hekima.
- 21** Kuna mipango mingi ndani ya moyo wa mtu,  
lakini kusudi la BWANA ndilo litakalosi-mama.
- 22** Lile mtu alionealo shauku ni upendo usio na  
mwisho,  
afadhali kuwa maskini kuliko kuwa  
mwongo.
- 23** Kumcha BWANA huongoza kwenye uzima,  
kisha mtu hupumzika akiwa ameridhika,  
bila kuguswa na shida.

- 24** Mtu mvivu hutumbukiza mkono wake kwenye sahani,  
lakini hawesi hata kuupeleka kwenye kinywa chake!
- 25** Mpige mwenye mzaha, naye mjinga atajifunza busara,  
mkemee mwenye ufahamu naye atapata maarifa.
- 26** Yeye amwibiaye baba yake na kumfukuza mama yake  
ni mwana aletaye aibu na fedheha.
- 27** Mwanangu, ukiacha kusikiliza mafundisho,  
utatangatanga mbali na maneno ya maarifa.
- 28** Shahidi mla rushwa hudhihaki hukumu  
na kinywa cha mtu mwovu humeza ubaya kwa upesi.
- 29** Adhabu zimeandaliwa kwa ajili ya wenye dhihaka  
na mapigo kwa ajili ya migongo ya wapumbavu.

## 20

- 1** Mvinyo ni mdhihaki na kileo ni mgomvi;  
seyote apotoshwaye navyo hana hekima.
- 2** Ghadhabu ya mfalme ni kama ngurumo ya simba;  
yeye amkasirishaye hypoteza uhai wake.

- <sup>3</sup> Ni kwa heshima ya mtu kujitenga ugomvi,  
bali kila mpumbavu ni mwepesi kugombana.
- <sup>4</sup> Mvivu halimi kwa majira;  
kwa hiyo wakati wa mavuno hutazama  
lakini hapati chochote.
- <sup>5</sup> Makusudi ya moyo wa mwanadamu ni maji  
yenye kina,  
lakini mtu mwenye ufahamu huyachota.
- <sup>6</sup> Watu wengi hujidai kuwa na upendo usiokoma,  
bali mtu mwaminifu ni nani awezaye  
kumpata?
- <sup>7</sup> Mtu mwenye haki huishi maisha yasiyo na  
lawama,  
wamebarikiwa watoto wake baada yake.
- <sup>8</sup> Wakati mfalme aketipo katika kiti chake cha  
enzi kuhukumu,  
hupepete ubaya wote kwa macho yake.
- <sup>9</sup> Ni nani awezaye kusema, “Nimeuweka moyo  
wangu safi;  
mimi ni safi na sina dhambi?”
- <sup>10</sup> Mawe ya kupimia yaliyo tofauti na vipimo  
tofauti,  
BWANA huchukia vyote viwili.
- <sup>11</sup> Hata mtoto hujulikana kwa matendo yake,

kama tabia yake ni safi na adili.

- 12 Masikio yasikiayo na macho yaonayo,  
BWANA ndiye alivifanya vyote viwili.
- 13 Usiupende usingizi la sivyo utakuwa maskini,  
uwe macho nawe utakuwa na chakula cha  
akiba.
- 14 “Haifai, haifai!” asema mnunuzi,  
kisha huondoka akijisifia ununuzi wake.
- 15 Dhahabu kunayo, na marijani kwa wingi,  
lakini midomo inenayo maarifa  
ni kito cha thamani kilicho adimu.
- 16 Chukua vazi la yule awekaye dhamana  
kwa ajili ya mgeni;  
lishikilie iwe dhamana kama anafanya hivyo  
kwa ajili ya mwanamke mpotovu.
- 17 Chakula kilichopatikana kwa hila ni kitamu  
kwa mwanadamu,  
bali huishia na kinywa kilichojaa  
changarawe.
- 18 Fanya mipango kwa kutafuta mashauri,  
ukipigana vita, tafuta maelekezo.
- 19 Maneno ya kusengenya husababisha ku-  
tokuaminika,  
kwa hiyo mwepuke mtu anayezungumza  
kupita kiasi.

- <sup>20</sup> Ikiwa mtu atamlaani baba yake au mama yake,  
taa yake itazimwa katika giza nene.
- <sup>21</sup> Uri thi upatikanao haraka mwanzoni,  
hautabarikiwa mwishoni.
- <sup>22</sup> Usiseme, “Nitakulipiza kwa ajili ya kosa hili!”  
Mngojee BWANA, naye atakuokoa.
- <sup>23</sup> BWANA anachukia sana mawe ya kupimia ya  
udanganyifu,  
nazo mizani zisizo halali hazimpendezi.
- <sup>24</sup> Hatua za mtu huongozwa na BWANA.  
Anawezaje basi mtu ye yote kuelewa njia  
yake mwenyewe?
- <sup>25</sup> Ni mtego kwa mtu kuweka wakfu kitu kwa  
haraka  
na baada ya kitambo kidogo kufikiria tena  
nadhire zake.
- <sup>26</sup> Mfalme mwenye hekima hupepeta waovu,  
hulipitisha gurudumu la kupuria juu yao.
- <sup>27</sup> Taa ya BWANA huchunguza roho ya  
mwanadamu,  
huchunguza utu wake wa ndani.
- <sup>28</sup> Upendo na uaminifu humweka mfalme  
salama,  
kwa njia ya upendo, kiti chake cha enzi  
huwa salama.

- <sup>29</sup> Utukufu wa vijana ni nguvu zao,  
mvi ni fahari ya uzee.
- <sup>30</sup> Mapigo na majeraha huusafisha ubaya,  
nayo michapo hutakasa utu wa ndani.

## 21

- <sup>1</sup> Moyo wa mfalme uko katika mkono wa BWANA;  
huuongoza kama mkondo wa maji, popote  
apendapo.
- <sup>2</sup> Njia zote za mwanadamu huonekana sawa  
kwake,  
bali BWANA huupima moyo.
- <sup>3</sup> Kufanya yaliyo sawa na haki inakubalika  
zaidi kwa BWANA kuliko dhabihu.
- <sup>4</sup> Macho ya kudharau na moyo wa kiburi,  
ambavyo ni taa ya waovu, vyote ni dhambi!
- <sup>5</sup> Mipango ya mwenye bidii huelekeza kwenye  
faida,  
kama vile kwa hakika pupa huelekeza  
kwenye umaskini.
- <sup>6</sup> Mali iliyopatikana kwa ulimi wa uongo  
ni mvuke upitao upesi na mtego wa kufisha.
- <sup>7</sup> Jeuri ya waovu itawaburuta mbali,  
kwa kuwa wanakataa kufanya yaliyo sawa.

- <sup>8</sup> Njia ya mwenye hatia ni ya upotovu,  
bali tabia ya mtu asiye na hatia ni nyofu.
- <sup>9</sup> Ni afadhali kuishi pembeni mwa paa la  
nyumba,  
kuliko kuishi nyumba moja na mke mgomvi.
- <sup>10</sup> Mtu mwovu hutamani sana ubaya,  
jirani yake hapati huruma kutoka kwake.
- <sup>11</sup> Wakati mwenye mzaha ameadhibiwa,  
mjinga hupata hekima;  
wakati mtu mwenye hekima afundishwapo,  
hupata maarifa.
- <sup>12</sup> Mwenye Haki huyajua yanayotendeka katika  
nyumba za waovu,  
naye atawaangamiza waovu.
- <sup>13</sup> Mtu akiziba masikio asisikie kilio cha maskini,  
yeye pia atalia, wala hatajibiwa.
- <sup>14</sup> Zawadi itolewayo kwa siri hutuliza hasira  
na rushwa iliyofichwa kwenye nguo  
hutuliza ghadhabu kali.
- <sup>15</sup> Wakati haki imetendeka, huleta furaha kwa  
wenye haki,  
bali kitisho kwa watenda mabaya.
- <sup>16</sup> Mtu anayepotea kutoka mapito ya ufahamu,  
hupumzika katika kundi la waliokufa.

- <sup>17</sup> Mtu apendaye anasa atakuwa maskini,  
yejote apendaye mvinyo na mafuta kamwe  
hatakuwa tajiri.
- <sup>18</sup> Waovu huwa fidia kwa ajili ya wenyе haki,  
naо wasio waaminifu kwa ajili ya wanyofu.
- <sup>19</sup> Ni afadhalii kuishi jangwani  
kuliko kuishi na mke mgomvi na mkorofi.
- <sup>20</sup> Katika nyumba ya mwenye hekima  
kuna akiba ya vyakula vizuri na mafuta,  
lakini mtu mpumbavu  
hutafuna vyote alivyo navyo.
- <sup>21</sup> Yeye afuatiaye haki na upendo  
hupata uzima, mafanikio na heshima.
- <sup>22</sup> Mtu mwenye hekima huushambulia mji wa  
wenye nguvu,  
na kuangusha ngome wanazozitegemea.
- <sup>23</sup> Yeye alindaye kinywa chake na ulimi wake  
hujilinda na maafa.
- <sup>24</sup> Mtu mwenye kiburi na majivuno, “Mdhihaki”  
ndilo jina lake;  
hutenda mambo kwa kiburi kilichozidi.
- <sup>25</sup> Kutamani sana kwa mvivu kutakuwa kifo  
chake,  
kwa sababu mikono yake haitaki kufanya  
kazi.

- 26** Mchana kutwa hutamani zaidi,  
lakini mnyofu hutoa pasipo kuzuia.
- 27** Dhabihu ya mtu mwovu ni chukizo,  
si zaidi sana itolewapo kwa nia mbaya!
- 28** Shahidi wa uongo ataangamia,  
bali maneno ya mwenye kusikia yatadumu.
- 29** Mtu mwovu ana uso wa ushupavu,  
bali mtu mnyofu huzifikiria njia zake.
- 30** Hakuna hekima, wala akili, wala mpango  
unaoweza kufaulu dhidi ya BWANA.
- 31** Farasi huandaliwa kwa ajili ya siku ya vita,  
bali ushindi huwa kwa BWANA.

## 22

- 1** Heri kuchagua jina jema kuliko utajiri mwingi,  
kuheshimiwa ni bora kuliko fedha au dha-habu.
- 2** Tajiri na maskini wanafanana kwa hili:  
BWANA ni Muumba wao wote.
- 3** Mtu mwenye busara huona hatari na kujificha,  
bali mjinga huendelea mbele kama kipofu  
nayo ikamtesa.
- 4** Unyenyekevu na kumcha BWANA  
huleta utajiri, heshima na uzima.
- 5** Katika mapito ya waovu kuna miiba na mitego,

bali yeye ailindaye nafsi yake hukaa mbali  
nayo.

- 6** Mfundishe mtoto njia impasayo kuiendea,  
naye hataiacha hata akiwa mzee.
- 7** Matajiri huwatawala maskini  
naye akopaye ni mtumwa wa akopeshaye.
- 8** Yeye aupandaye uovu huvuna taabu,  
nayo fimbo ya ghadhabu yake  
itaangamizwa.
- 9** Mtu mkarimu yeye mwenyewe atabarikiwa  
kwa kuwa hushiriki chakula chake na mask-  
ini.
- 10** Mfukuze mwenye dhihaka,  
na mvutano utatoweke;  
ugomvi na matukano vitakoma.
- 11** Yeye apendaye moyo safi na yeye ambaye  
maneno yake ni ya neema,  
mfalme atakuwa rafiki yake.
- 12** Macho ya BWANA hulinda maarifa,  
bali huyapinga maneno ya asiyé  
mwaminifu.
- 13** Mvivu husema, “Yuko simba nje!”  
au, “Nitauawa katika mitaa!”
- 14** Kinywa cha mwanamke kahaba ni shimo refu;  
yeye aliye chini ya ghadhabu ya BWANA

atatumbukia ndani yake.

- 15 Upumbavu umefungwa ndani ya moyo wa mtoto,  
bali fimbo ya adhabu itaufukuzia mbali naye.
- 16 Yeye amwoneaye maskini ili kujiongezea mali,  
naye ampaye tajiri zawadi, wote huwa maskini.

### *Misemo Ya Wenye Hekima*

- 17 Tega sikio na usikie misemo ya wenye hekima,  
elekeza moyo wako kwenye yale nifundishayo,
- 18 kwa maana inapendeza unapoyahifadhi moyoni mwako  
na kuwa nayo yote tayari midomoni mwako.
- 19 Ili tumaini lako liwe katika BWANA,  
hata wewe, ninakufundisha leo.
- 20 Je, sijakuandikia misemo thelathini,  
misemo ya mashauri na maarifa,
- 21 kukufundisha maneno ya kweli na ya kuaminika,  
ili uweze kutoa majibu sahihi  
kwake yeye aliyekutuma?
- 22 Usiwadhulumu maskini kwa sababu ni maskini,  
wala kumdhulumu mhitaji mahakamani,
- 23 kwa sababu BWANA atalichukua shauri lao  
naye atawateka wao waliowateka.

- <sup>24</sup> Usifanye urafiki na mtu mwenye hasira ya haraka,  
usishirikiane na yule aliye mwepesi kukasirika,
- <sup>25</sup> la sivyo utajifunza njia zake  
na kuijingiza mwenyewe kwenye mtego.
- <sup>26</sup> Usiwe mwenye kupana mikono katika rehani,  
au kuweka dhamana kwa ajili ya madeni.
- <sup>27</sup> Kama ukikosa njia ya kulipa,  
kitanda chako  
kitachukuliwa ukiwa umekilalia.
- <sup>28</sup> Usisogeze jiwe la mpaka wa zamani  
lililowekwa na baba zako.
- <sup>29</sup> Je, unamwona mtu stadi katika kazi yake?  
Atahudumu mbele ya wafalme;  
hatahudumu mbele ya watu duni.

## 23

- <sup>1</sup> Uketipo kula chakula na mtawala,  
angalia vyema kile kilicho mbele yako,
- <sup>2</sup> na utie kisu kooni mwako  
kama ukiwa mlafi.
- <sup>3</sup> Usitamani vyakula vyake vitamu  
kwa kuwa chakula hicho ni cha hila.
- <sup>4</sup> Usijitaabishe ili kuupata utajiri,  
uwe na hekima kuonyesha kujizuia.
- <sup>5</sup> Kufumba na kufumbua utajiri hutoweke,  
huwa kama umepata mabawa ghafula,  
ukaruka na kutoweke angani kama tai.

- 6** Usile chakula cha mtu mchoyo,  
usitamani vyakula vyake vitamu,
- 7** kwa maana yeye ni aina ya mtu  
ambaye kila mara anafikiri juu ya gharama.  
Anakuambia, "Kula na kunywa,"  
lakini moyo wake hauko pamoja nawe.
- 8** Utatapika kile kidogo ulichokula,  
nawe utakuwa umepoteza bure  
maneno yako ya kumsifu.
- 9** Usizungumze na mpumbavu,  
kwa maana atadhihaki hekima ya maneno  
yako.
- 10** Usisogezo jiwe la mpaka wa zamani  
wala kunyemelea kwenye mashamba ya  
yatima,
- 11** kwa kuwa Mtetezi wao ni mwenye nguvu,  
atalichukua shauri lao dhidi yako.
- 12** Elekeza moyo wako kwenye mafundisho  
na masikio yako kwenye maneno ya maar-  
ifa.
- 13** Usimnyime mtoto adhabu,  
ukimwadhibu kwa fimbo, hatakuwa.
- 14** Mwadhibu kwa fimbo  
na kuiokoa nafsi yake kutoka mautini.\*
- 15** Mwanangu, kama moyo wako una hekima,  
basi moyo wangu utafurahi,
- 16** utu wangu wa ndani utafurahi,

---

\* **23:14** Mautini maana yake ni Kuzimu.

wakati midomo yako  
itakapozungumza lililo sawa.

- 17 Usiuruhusu moyo wako kuwaonea vivu  
wenye dhambi,  
bali kila mara uwe na bidii katika kumcha  
**BWANA.**
- 18 Hakika kuna tumaini la baadaye kwa ajili  
yako,  
nalo tarajio lako halitakatiliwa mbali.
- 19 Sikiliza, mwanangu na uwe na hekima,  
weka moyo wako kwenye njia iliyo sawa.
- 20 Usiwe mionganoni mwa wanywao mvinyo,  
au wale walao nyama kwa pupa,
- 21 kwa maana walevi na walafi huwa maskini,  
nako kusinzia huwavika matambara.
- 22 Msikilize baba yako, aliyekuzaa,  
wala usimdharaun mama yako atakapokuwa  
mzee.
- 23 Nunua kweli wala usiuze,  
pata hekima, adabu na ufahamu.
- 24 Baba wa mwenye haki ana furaha kubwa,  
naye aliye na mwana mwenye hekima hum-  
furahia.
- 25 Baba yako na mama yako na wafurahi,  
mama aliyekuzaa na ashangilie!
- 26 Mwanangu, nipe moyo wako,  
macho yako na yafuate njia zangu,
- 27 kwa maana kahaba ni shimo refu  
na mwanamke mpotovu ni kisima chem-  
bamba.

- 28 Kama mnyang'anyi, hungojea akivizia,  
 naye huzidisha wasio waaminifu mionganoni  
 mwa wanaume.
- 29 Ni nani mwenye ole?  
 Ni nani mwenye huzuni?  
 Ni nani mwenye ugomvi?  
 Ni nani mwenye malalamiko?  
 Ni nani aliye na majeraha yasiyo na sababu?  
 Ni nani mwenye macho mekundu?
- 30 Ni hao wakaao sana kwenye mvinyo,  
 hao waendao kuonja mabakuli ya mvinyo  
 uliochanganywa.
- 31 Usiukodolee macho mvinyo wakati ukiwa  
 mwekundu,  
 wakati unapometameta kwenye bilauri,  
 wakati ushukapo taratibu!
- 32 Mwishowe huuma kama nyoka  
 na kutia sumu yake kama nyoka mwenye  
 sumu.
- 33 Macho yako yataona mambo mageni  
 na moyo wako kuwazia mambo yaliyopotoke.
- 34 Utakuwa kama alalaye katikati ya bahari,  
 alalaye juu ya kamba ya merikebu.
- 35 Utasema, "Wamenipiga lakini sikuumia!  
 Wamenichapa, lakini sisikii!  
 Nitaamka lini  
 ili nikanywe tena?"

## 24

- <sup>1</sup> Usiwaonee wivu watu waovu,  
 usitamani ushirika nao;

- <sup>2</sup> kwa maana mioyo yao hupanga mambo ya  
jeuri,  
nayo midomo yao husema juu ya kuleta  
madhara.
- <sup>3</sup> Kwa hekima nyumba hujengwa,  
nayo kwa njia ya ufahamu huimarishwa
- <sup>4</sup> kwa njia ya maarifa vyumba vyake hujazwa  
vitu via thamani na via kupendeza.
- <sup>5</sup> Mtu mwenye hekima ana uwezo mkubwa,  
naye mtu mwenye maarifa huongeza nguvu,
- <sup>6</sup> kwa kufanya vita unahitaji uongozi  
na kwa ushindi washauri wengi.
- <sup>7</sup> Hekima i juu mno kwa mpumbavu,  
katika kusanyiko langoni  
hana lolote la kusema.
- <sup>8</sup> Yeye apangaye mabaya  
atajulikana kama mtu wa hila.
- <sup>9</sup> Mipango ya upumbavu ni dhambi,  
watu huchukizwa na mwenye dhihaka.
- <sup>10</sup> Ukitaka tamaa wakati wa taabu,  
jinsi gani nguvu zako ni kidogo!
- <sup>11</sup> Okoa wale wanaoongozwa kwenye kifo;  
wazuie wote wanaojikokota  
kuelekea machinjoni.
- <sup>12</sup> Kama mkisema, “Lakini hatukujua lolote  
kuhusu hili,”  
je, yule apimaye mioyo halitambui hili?  
Je, yule awalindaye maisha yenu halijui hili?

Je, hatamlipa kila mtu kulingana na aliy-otenda?

- 13 Ule asali mwanangu, kwa kuwa ni nzuri; asali kutoka kwenye sega ni tamu kwa kuonja.
- 14 Ujue pia kwamba hekima ni tamu kwa nafsi yako, kama ukiipata, kuna matumaini kwako ya siku zijazo, nalo tumaini lako halitakatiliwa mbali.
- 15 Usivizie kama haramia afanyavyo ili kuyashambulia makao ya mwenye haki, wala usiyavamie makazi yake,
- 16 Kwa maana ingawa mtu mwenye haki hanguka mara saba, huinuka tena, lakini waovu huangushwa chini na maafa.
- 17 Usitazame kwa kufurahia adui yako aangukapo; wakati ajikwaapo, usiruhusu moyo wako ushangilie.
- 18 BWANA asije akaona na kuchukia akaiondoa ghadhabu yake mbali naye.
- 19 Usikasirike kwa sababu ya watu wabaya wala usiwaonee wivu waovu,
- 20 kwa maana mtu mbaya hana tumaini la siku zijazo, nayo taa ya waovu itazimwa.

- <sup>21</sup> Mwanangu, mche BWANA na mfalme,  
wala usijiunge na waasi,  
<sup>22</sup> kwa maana hao wawili watatuma maangamizi  
ya ghafula juu yao,  
naye ni nani ajuaye maafa wavezayo  
kuleta?

*Misemo Zaidi Ya Wenyewe Hekima*

- <sup>23</sup> Hii pia ni misemo ya wenye hekima:  
Kuonyesha upendeleo katika hukumu si vyema:  
<sup>24</sup> Yeyote amwambiaye mwenye hatia,  
“Wewe huna hatia,”  
Kabila zitamlaani  
na mataifa yatamkana.  
<sup>25</sup> Bali itakuwa vyema kwa wale watakaowatia  
hatiani wenye hatia,  
nazo baraka tele zitawajilia juu yao.
- <sup>26</sup> Jawabu la uaminifu  
ni kama busu la midomoni.
- <sup>27</sup> Maliza kazi zako za nje,  
nawe uweke mashamba yako tayari,  
baada ya hayo, jenga nyumba yako.
- <sup>28</sup> Usishuhudie dhidi ya jirani yako bila sababu,  
au kutumia midomo yako kudanganya.
- <sup>29</sup> Usiseme, “Nitamtenda kama alivyonitenda  
mimi;  
nitamlipiza mtu yule kwa kile alichoniten-  
dea.”
- <sup>30</sup> Nilipita karibu na shamba la mvivu,

- karibu na shamba la mizabibu la mtu asiyen  
na akili,  
 31 miiba ilikuwa imeota kila mahali,  
ardhi ilikuwa imefunikwa na magugu, na  
ukuta wa mawe ulikuwa umebomoka.  
 32 Nikatafakari moyoni mwangu lile nililoliona,  
nami nikajifunza somo kutokana na nilyoyaona:  
 33 Bado kulala kidogo, kusinzia kidogo,  
bado kukunja mikono kidogo upate  
kupumzika:  
 34 hivyo umaskini utakuja juu yako kama  
mnyang'anyi,  
na kupungukiwa kutakujia kama mtu  
mwenye silaha.

## 25

### *Mithali Zaidi Za Solomoni*

- <sup>1</sup> Hizi ni mithali zaidi za Solomoni, zilizon-  
akiliwa na watu wa Hezekia mfalme wa Yuda:  
<sup>2</sup> Ni Utukufu wa Mungu kuficha jambo,  
bali ni utukufu wa wafalme kuchunguza  
jambo.
- <sup>3</sup> Kama mbingu zilivyo juu na nchi ilivyo chini,  
ndivyo ambavyo mioyo ya wafalme  
haichunguziki.
- <sup>4</sup> Ondoa takataka kwenye madini ya fedha,  
nako ndani yake kutatokea chombo  
cha mfua fedha.
- <sup>5</sup> Ondoa waovu mbele ya mfalme,  
nacho kitu chake cha enzi  
kitaimarishwa kwa njia ya haki.

- <sup>6</sup> Usijikweze mwenyewe mbele ya mfalme,  
wala usidai nafasi miongoni mwa watu  
wakuu;  
<sup>7</sup> ni afadhali yeye akuambie, “Njoo huku juu,”  
kuliko yeye kukuaibisha mbele ya mkuu.

Kile ulichokiona kwa macho yako  
<sup>8</sup> usiharakishe kukipeleka mahakamani,  
maana utafanya nini mwishoni  
kama jirani yako atakuaibisha?

- <sup>9</sup> Kama ukifanya shauri na jirani yako,  
usisaliti siri ya mtu mwingine,  
<sup>10</sup> ama yeye aisikiaye aweza kukuaibisha  
na kamwe sifa yako mbaya haitaondoka.
- <sup>11</sup> Neno lisemwalo kwa wakati ufaao  
ni kama matunda ya mtofaa ya dhahabu  
yaliyowekwa kwenye vijalizo vya fedha.
- <sup>12</sup> Kama vile kipuli cha dhahabu  
au pambo la dhahabu safi,  
ndivyo lilivyo karipio la mtu mwenye hekima  
kwa sikio lisikilizalo.
- <sup>13</sup> Kama vile ubaridi wa theluji wakati wa  
mavuno  
ndivyo alivyo mjumbe mwaminifu kwa wale  
wamtumao,  
huburudisha roho za bwana zake.
- <sup>14</sup> Kama vile mawingu na upepo pasipo mvua  
ndivyo alivyo mtu ajisifuye kwa zawadi  
ambazo hatoi.

- 15 Kwa njia ya uvumilivu mtawala aweza kushawishiwa,  
nao ulimi laini wawezwa kuvunja mfupa.
- 16 Ukipata asali, kula kiasi tu cha kukutosha,  
ukila zaidi, utatapika.
- 17 Ingiza mguu wako nyumbani kwa jirani yako mara chache,  
ukizidisha, atakukinai na atakuchukia.
- 18 Kama vile rungu au upanga au mshale mkali ndivyo alivyo mtu atoaye ushuhuda wa uongo dhidi ya jirani yake.
- 19 Kama vile jino bovu au mguu uliolemaa,  
ndivyo ilivyo kumtegemea mtu asiye mwaminifu wakati wa shida.
- 20 Kama vile avuaye mavazi siku ya baridi,  
au kama siki iliyomwagwa juu ya magadi,  
ndivyo alivyo ye ye amuimbiaye nyimbo mtu mwenye moyo mzito.
- 21 Kama adui yako ana njaa, mpe chakula ale;  
kama ana kiu, mpe maji anywe.
- 22 Kwa kufanya hivyo, unaweka makaa ya moto yanayowaka kichwani pake,  
naye BWANA atakupa thawabu.
- 23 Kama vile upepo wa kaskazini uletavyo mvua,  
ndivyo ulimi usingiziao uletavyo uso wa hasira.

- <sup>24</sup> Ni afadhali kuishi pemberi mwa paa la nyumba,  
kuliko kuishi nyumba moja na mke mgomvi.
- <sup>25</sup> Kama vile maji baridi kwa nafsi iliyochoka  
ndivyo zilivyo habari njema kutoka nchi ya mbali.
- <sup>26</sup> Kama vile chemchemi iliyotibuliwa matope au  
kisima kilichotiwa taka  
ndivyo alivyo mtu mwenye haki  
akishiriki na waou.
- <sup>27</sup> Si vyema kula asali nydingi sana,  
wala si heshima  
kujitafutia heshima yako mwenyewe.
- <sup>28</sup> Kama vile mji ambao kuta zake zimebomoka  
ndivyo alivyo mtu  
ambaye hawezi kujitawala mwenyewe.

## 26

- <sup>1</sup> Kama theluji wakati wa kiangazi au mvua  
wakati wa mavuno,  
ndivyo asivyostahili heshima mpumbavu.
- <sup>2</sup> Kama shomoro apigapigavyo mabawa yake  
au mbayuwayu katika kuruka kwake kasi,  
ndivyo ilivyo laana isiyo na sababu haimpati  
mtu.
- <sup>3</sup> Mjeledi kwa farasi, lijamu kwa punda,  
nayo fimbo kwa migongo ya wapumbavu!

- <sup>4</sup> Usimjibu mpumbavu sawasawa na upumbavu wake,  
ama wewe mwenyewe utakuwa kama yeye.
- <sup>5</sup> Mjibu mpumbavu sawasawa na upumbavu wake,  
ama atakuwa mwenye hekima machoni pake mwenyewe.
- <sup>6</sup> Kama vile ilivyo kujikata miguu au kunywa hasara,  
ndivyo ilivyo kutuma ujumbe kwa mkono wa mpumbavu.
- <sup>7</sup> Kama miguu ya kiwete inavyoning'inia  
ndivyo ilivyo mithali katika kinywa cha mpumbavu.
- <sup>8</sup> Kama kufunga jiwe kwenye kombeo,  
ndivyo ilivyo kumpa mpumbavu heshima.
- <sup>9</sup> Kama mwiba kwenye mkono wa mlevi  
ndivyo ilivyo mithali kinywani mwa mpumbavu.
- <sup>10</sup> Kama mpiga upinde ambaye hujeruhi ovyo,  
ndivyo alivyo yeye aajiriye mpumbavu au ye yote apitaye njiani.
- <sup>11</sup> Kama mbwa ayarudiavyo matapiko yake,  
ndivyo mpumbavu arudiavyo upumbavu wake.

- 12** Je, unamwona mtu ajionaye mwenye hekima machoni pake mwenyewe?  
 Liko tumaini zaidi kwa mpumbavu kuliko kwake.
- 13** Mvivu husema, "Yuko simba barabarani,  
 simba mkali anazunguka mitaa!"
- 14** Kama vile mlango ugeukavyo kwenye bawaba zake,  
 ndivyo mvivu ajigeuzavyo kitandani mwake.
- 15** Mtu mvivu hutumbukiza mkono wake kwenye sahani,  
 naye huchoka kuupeleka kwenye kinywa chake.
- 16** Mtu mvivu ni mwenye hekima machoni pake mwenyewe,  
 kuliko watu saba wawezao kujibu kwa busara.
- 17** Kama ye ye amkamataye mbwa kwa masikio,  
 ndivyo alivyo mtu apitaye njiani na kujiingiza kwenye ugomvi usiomhusu.
- 18** Kama mtu mwendawazimu atupaye vijinga vy a moto au mishale ya kufisha,
- 19** ndivyo alivyo mtu amdanganyaye jirani yake na kusema,  
 "Nilikuwa nikifanya mzaha tu!"
- 20** Bila kuni moto huzimika;

pasipo uchongezi ugomvi humalizika.

- 21 Kama makaa juu ya makaa yanayowaka, na kama kuni kwenye moto, ndivyo alivyo mtu mgomvi kwa kuchochea ugomvi.
- 22 Maneno ya mchongezi ni kama chakula kitamu; huingia sehemu za ndani sana za mtu.
- 23 Kama rangi ing'aayo iliyopakwa kwenye vyombo vyaa udongo ndivyo ilivyo midomo laini pamoja na moyo mbaya.
- 24 Mtu mwenye nia ya kudhuru wengine huificha kwa maneno ya midomo yake, lakini moyoni mwake huficha udanganyifu.
- 25 Ingawa maneno yake huvutia, usimwamini, kwa maana machukizo saba hujaza moyo wake.
- 26 Nia yake ya kudhuru wengine inaweza kufichwa na udanganyifu, lakini uovu wake utafichuliwa kwenye kusanyiko.
- 27 Kama mtu akichimba shimo, atatumbukia ndani yake, kama mtu akivingirisha jiwe, litamrudia.
- 28 Ulimi wa uongo, huwachukia wale unaowau-miza,

nacho kinywa cha kujipendekeza hutenda  
uharibifu.

## 27

<sup>1</sup> Usijisifu kwa ajili ya kesho,  
kwa kuwa hujui ni nini kitakachozaliwa kwa  
siku moja.

<sup>2</sup> Mwache mwingine akusifu,  
wala si kinywa chako mwenyewe;  
mtu mwingine afanye hivyo  
na si midomo yako mwenyewe.

<sup>3</sup> Jiwe ni zito na mchanga ni mzigo,  
lakini kukasirishwa na mpumbavu ni kuzito  
kuliko vyote viwili.

<sup>4</sup> Hasira ni ukatili na ghadhabu kali ni gharika,  
lakini ni nani awezaye kusimama mbele ya  
wivu?

<sup>5</sup> Afadhali karipio la wazi  
kuliko upendo uliofichika.

<sup>6</sup> Majeraha kutoka kwa rafiki yaonyesha  
uaminifu,  
bali kubusu kwa adui ni kwingi sana.

<sup>7</sup> Yeye aliyeshiba huchukia kabisa asali,  
bali kwa mwenye njaa  
hata kile kilicho kichungu  
kwake ni kitamu.

- <sup>8</sup> Kama ndege atangatangavyo mbali na kiota chake,  
ndivyo alivyo mtu atangatangaye mbali na nyumbani mwake.
- <sup>9</sup> Manukato na uvumba huleta furaha moyoni,  
nao uzuri wa rafiki huchipuka kutoka kwenye ushauri wake wa uaminifu.
- <sup>10</sup> Usimwache rafiki yako wala rafiki wa baba yako,  
tena usiende nyumbani mwa ndugu yako wakati umepatwa na maafa.  
Bora jirani wa karibu kuliko ndugu aliye mbali.
- <sup>11</sup> Mwanangu, uwe na hekima,  
nawe ulete furaha moyoni mwangu,  
ndipo nitakapoweza kumjibu yeoyote anitendaye kwa dharaau.
- <sup>12</sup> Mtu mwenye busara huona hatari na kujificha,  
bali mjinga huendelea mbele nayo ikamtesa.
- <sup>13</sup> Chukua vazi la yule awekaye dhamana  
kwa ajili ya mgeni;  
lishikilie iwe dhamana kama anafanya hivyo  
kwa ajili ya mwanamke mpotovu.
- <sup>14</sup> Kama mtu akimbariki jirani yake kwa sauti  
kuu  
asubuhi na mapema,  
itahesabiwa kama ni laana.

- 15 Mke mgomvi ni kama  
matone yasiyokoma ya siku ya mvua.
- 16 Kumzuia yeye ni kama kuuzuia upepo  
au kukamata mafuta kwa kiganja cha  
mkono.
- 17 Kama vile chuma kinoavyo chuma,  
ndivyo mtu amnoavyo mwenzake.
- 18 Yeye autunzaye mtini atakula tunda lake,  
naye amtunzaye bwana wake ataheshimiwa.
- 19 Kama uso uonekanavyo kwenye maji,  
ndivyo hivyo moyo wa mtu humwonyesha  
alivyo.
- 20 Kuzimu na Uharibifu havishibi  
kadhalika macho ya mwanadamu.
- 21 Kalibu ni kwa ajili ya fedha  
na tanuru kwa ajili ya dhahabu,  
bali mtu hupimwa kwa sifa azipokeazo.
- 22 Hata ukimtwanga mpumbavu kwenye kinu,  
ukimtwanga kama nafaka kwa mchi,  
hutauondoa upumbavu wake.
- 23 Hakikisha kuwa unajua hali ya makundi yako  
ya kondoo na mbuzi,  
angalia kwa bidii ng'ombe zako.
- 24 Kwa kuwa utajiri haudumu milele,  
nayo taji haidumu vizazi vyote.
- 25 Wakati majani makavu yameondolewa

- na mapya yamechipua,  
 nayo majani toka milimani yamekusanywa,  
<sup>26</sup> wana-kondoo watakupatia mavazi  
 na mbuzi thamani ya shamba.  
<sup>27</sup> Utakuwa na maziwa mengi ya mbuzi  
 kukulisha wewe na jamaa yako,  
 na kuwalisha watumishi wako wa kike.

## 28

- <sup>1</sup> Mtu mwovu hukimbia ingawa hakuna ye yote  
 anayemfukuza,  
 bali wenye haki ni wajasiri kama simba.
- <sup>2</sup> Wakati nchi inapokuwa na uasi, inakuwa na  
 viongozi wengi,  
 bali mwenye ufahamu na maarifa hudumisha utaratibu.
- <sup>3</sup> Mtu maskini amwoneaye yeye aliye maskini  
 zaidi  
 ni kama mvua ya dhoruba isiyosaza mazao.
- <sup>4</sup> Wale waiachao sheria huwasifu waovu,  
 bali wale waishikao sheria huwapinga.
- <sup>5</sup> Watu wabaya hawaelewii haki,  
 bali wale wamtafutao BWANA wanaielewa  
 kikamilifu.
- <sup>6</sup> Afadhali maskini ambaye mwenendo wake  
 hauna lawama  
 kuliko tajiri ambaye njia zake ni potovu.

- <sup>7</sup> Yeye ashikaye sheria ni mwana mwenye ufa-hamu,  
bali rafiki wa walafi humwaibisha baba yake.
- <sup>8</sup> Yeye aongezaye utajiri wake kwa riba kubwa  
mno  
hukusanya kwa ajili ya mwingine,  
ambaye atawahurumia maskini.
- <sup>9</sup> Kama mtu yejote akikataa kusikia sheria,  
hata maombi yake ni chukizo.
- <sup>10</sup> Yeye ambaye humwongoza mwenye haki  
kwenye mapito mabaya,  
ataanguka kwenye mtego wake mwenyewe,  
bali wasio na lawama watapokea urithi  
mwema.
- <sup>11</sup> Mtu tajiri anaweza kuwa na hekima machoni  
pake mwenyewe,  
bali mtu maskini mwenye ufahamu atam-fichua.
- <sup>12</sup> Mwenye haki ashindapo, kuna furaha kubwa,  
bali waovu watawalapo, watu hujificha.
- <sup>13</sup> Yeye afichaye dhambi zake hatafanikiwa,  
bali yejote aziungamaye na kuziacha hupata  
rehema.
- <sup>14</sup> Amebarikiwa mtu ambaye siku zote humcha  
BWANA,  
bali yejote afanyaye moyo wake kuwa mgumu

huangukia kwenye taabu.

- <sup>15</sup> Kama simba angurumaye au dubu ashambuli-  
aye,  
ndivyo alivyo mtu mwovu atawalaye wany-  
onge.
- <sup>16</sup> Mtawala dhalimu hana akili,  
bali yeye achukiaye mapato ya udhalimu  
atafurahia maisha marefu.
- <sup>17</sup> Mtu mwenye kusumbuliwa na hatia ya kuua  
atakuwa mtoro mpaka kufa;  
mtu yejote na asimsaidie.
- <sup>18</sup> Yeye ambaye mwenendo wake hauna lawama  
hulindwa salama,  
bali yeye ambaye njia zake ni potovu  
ataanguka ghafula.
- <sup>19</sup> Yeye alimaye shamba lake atakuwa na chakula  
tele,  
bali yule afuataye mambo ya upuzi atakuwa  
na umaskini wa kumtosha.
- <sup>20</sup> Mtu mwaminifu atabarikiwa sana,  
bali yeye atamaniye kupata utajiri kwa  
haraka  
hataacha kuadhibiwa.
- <sup>21</sup> Kuonyesha upendeleo si vizuri,  
hata hivyo mtu atafanya kosa kwa kipande  
cha mkate.

- 22** Mtu mchoyo ana tamaa ya kupata utajiri,  
naye hana habari kuwa umaskini unamngogea.
- 23** Yeye amkemeaye mtu mwishoni hupata kibali  
zaidi,  
kuliko mwenye maneno ya kusifu  
isivyostahili.
- 24** Yeye amwibiaye babaye au mamaye  
na kusema, "Si kosa,"  
yeye ni mwenzi wa yule aharibuye.
- 25** Mtu mwenye tamaa huchochea fitina,  
bali yule amtegemeaye BWANA atafanikiwa.
- 26** Yeye ajitumainiaye mwenyewe ni mpumbavu,  
bali yeye atembeaye katika hekima  
hulindwa salama.
- 27** Yeye ampaye maskini  
hatapungukiwa na kitu chochote,  
bali yeye awafumbiaye maskini macho  
hupata laana nyingi.
- 28** Wakati waovu watawalapo,  
watu huenda mafichoni,  
bali waovu wanapoangamia,  
wenye haki hufanikiwa.

**29**

- 1** Mtu anayeendelea kuwa na shingo ngumu  
baada ya maonyo mengi,

ataangamia ghafula, wala hapati dawa.

- 2** Wenye haki wanapostawi, watu hufurahi;  
waovu watawalapo, watu hulia kwa huzuni.
- 3** Mtu apendaye hekima huleta furaha kwa baba  
yake,  
bali aambatanaye na makahaba hutapanya  
mali yake.
- 4** Kwa haki mfalme huipa nchi uthabiti,  
bali mfalme aliye na tamaa ya rushwa  
huiangamiza.
- 5** Yeyote amsifuye jirani yake isivyostahili,  
anautandaza wavu kuitega miguu yake.
- 6** Mtu mbaya hutegwa na dhambi yake  
mwenyewe  
bali mwenye haki huweza kuimba na kufu-  
rahi.
- 7** Mwenye haki hujali haki kwa ajili ya maskini,  
bali mwovu hajishughulishi na hilo.
- 8** Wenye mzaha huuchochea mji,  
bali watu wenye hekima hugeuzia mbali  
hasira.
- 9** Kama mwenye hekima akienda mahakamani  
na mpumbavu,  
mpumbavu hukasirika na kudhihaki, wala  
hakuna amani.

- 10 Watu wamwagao damu humchukia mtu mwadilifu na hutafuta kumuua mtu mnyofu.
- 11 Mpumbavu huonyesha hasira yake yote, bali mwenye hekima hujizuia.
- 12 Kama mtawala akisikiliza uongo, maafisa wake wote huwa waovu.
- 13 Mtu maskini na mtu anayeonea wanafanana kwa jambo hili:  
BWANA hutia nuru macho yao wote wawili.
- 14 Kama mfalme akiwaamua maskini kwa haki, kitu chake cha enzi kitakuwa thabiti siku zote.
- 15 Fimbo ya maonyo hutia hekima, bali mtoto aliyeachiwa bila maonyo humwaibisha mama yake.
- 16 Wakati waovu wanapostawi, pia dhambi vivyo hivyo, lakini wenye haki wataliona anguko lao.
- 17 Mrudi mwanaao, naye atakupa amani, atakufurahisha nafsi yako.
- 18 Mahali pasipo na ufunuo, watu kujizuia, bali ana heri mtu yule aishikaye sheria.
- 19 Mtumishi hawezi kuonywa kwa maneno matupu,

ajapoelewa, hataitikia.

- 20** Je, unamwona mtu azungumzaye kwa haraka?  
Kuna matumaini zaidi kwa mpumbavu ku-liko yeye.
- 21** Kama mtu akimdekeza mtumishi wake tangu ujanani,  
atamletea sikitiko mwishoni.
- 22** Mtu mwenye hasira huchochea ugomvi,  
naye mtu mwenye hasira ya haraka hutenda dhambi nyangi.
- 23** Kiburi cha mtu humshusha,  
bali mtu mwenye roho ya unyenyekevu hupata heshima.
- 24** Anayekubaliana na mwizi ni adui wa nafsi  
yake mwenyewe;  
huapishwa lakini hathubutu kushuhudia.
- 25** Kuwaogopa watu huwa ni mtego,  
bali ye yeyote amtumainiaye BWANA atakuwa salama.
- 26** Wengi hutafuta kusikilizwa na mtawala,  
bali mtu hupata haki kutoka kwa BWANA.
- 27** Mwenye haki huwachukia sana wasio waaminifu;  
waovu huwachukia sana wenyе haki.

# 30

## *Misemo Ya Aguri*

- <sup>1</sup> Misemo ya Aguri mwana wa Yake, usia:  
 Huyu mtu alimwambia Ithieli,  
 naam, kwa Ithieli na kwa Ukali:
- <sup>2</sup> "Mimi ni mjinga kuliko wanadamu wote;  
 sina ufahamu wa kibinadamu.
- <sup>3</sup> Sijajifunza hekima,  
 wala sina maarifa ya kumjua yeye Aliye  
 Mtakatifu.
- <sup>4</sup> Ni nani ameshapanda mbinguni na kushuka?  
 Ni nani ameshakusanya upepo  
 kwenye vitanga vyta mikono yake?
- Ni nani ameshafungia maji kwenye nguo yake?  
 Ni nani ameimarisha miisho yote ya dunia?
- Jina lake ni nani, na mwanawe anaitwa nani?  
 Niambie kama unajua!
- <sup>5</sup> "Kila neno la Mungu ni kamilifu;  
 yeye ni ngao kwa wale wanaomkimbilia.
- <sup>6</sup> Usiongeze kwenye maneno yake,  
 ama atakukemea na kukuthibitisha kuwa  
 mwongo.
- <sup>7</sup> "Ninakuomba vitu viwili, Ee BWANA;  
 usininyime kabla sijafa:
- <sup>8</sup> Utenge mbali nami udanganyifu na uongo;  
 usinipe umaskini wala utajiri,  
 bali unipe chakula cha kunitosha kila siku.
- <sup>9</sup> Nisije nikawa na vingi vyta kuzidi nikakukana  
 na kusema, 'BWANA ni nani?'  
 Au nisije nikawa maskini nikaiba,

nami nikaliaibisha jina la Mungu wangu.

<sup>10</sup> “Usimchongee mtumishi kwa bwana wake,  
asije akakulaani, ukapatilizwa kwalo.

<sup>11</sup> “Wako watu wale ambaو huwalaani baba zao  
na wala hawawabariki mama zao;

<sup>12</sup> wale ambaو ni safi machoni pao wenyewe  
kumbe hawakuoshwa uchafu wao;

<sup>13</sup> wale ambaو daima macho yao ni ya kiburi,  
ambao kutazama kwao ni kwa dharau;

<sup>14</sup> wale ambaو meno yao ni panga  
na ambaو mataya yao yamewekwa visu  
kuwaangamiza maskini katika nchi,  
na wahitaji kutoka mionganii mwa  
wanadamu.

<sup>15</sup> “Mruba anao binti wawili waliao,  
‘Nipe! Nipe!’

“Kuna vitu vitatu visivyotosheka kamwe,  
naam, viko vinne visivyosema, ‘Yatosha!’:

<sup>16</sup> Ni kaburi, tumbo lisilozaa,  
nchi isiyoshiba maji kamwe,  
na moto, usiosema kamwe, ‘Yatosha!’

<sup>17</sup> “Jicho lile limdhihakilo baba,  
lile linalodharau kumtii mama,  
litang’olewa na kunguru wa bondeni,  
litaliwa na tai.

<sup>18</sup> “Kuna vitu vitatu vinavyonishangaza sana,  
naam, vinne nisivyovielewa:

<sup>19</sup> Ni mwendo wa tai katika anga,

mwendo wa nyoka juu ya mwamba,  
 mwendo wa meli katika maji makuu ya bahari,  
 nao mwendo wa mtu pamoja na msichana.

- 20 "Huu ndio mwendo wa mwanamke mzinzi,  
     hula akapangusa kinywa chake na kusema,  
     'Sikufanya chochote kibaya.'
- 21 "Kwa mambo matatu nchi hutetemeka,  
     naam, kwa mambo manne haiwezi kuvumilia:
- 22 Mtumwa awapo mfalme,  
     mpumbavu ashibapo chakula,
- 23 mwanamke asiyependwa aolewapo,  
     naye mtumishi wa kike achukuapo nafasi ya  
     bibi yake.
- 24 "Vitu vinne duniani vilivyo vidogo,  
     lakini vina akili nyingi sana:
- 25 Mchwa ni viumbe wenye nguvu ndogo,  
     hata hivyo hujiwekea akiba ya chakula chao  
     wakati wa kiangazi.
- 26 Pelele ni viumbe vyenye uwezo mdogo  
     hata hivyo hujitengenezea nyumba zao  
     kwenye miamba.
- 27 Nzige hawana mfalme,  
     hata hivyo huenda pamoja vikosi vikosi.
- 28 Mjusi anaweza kushikwa kwa mkono,  
     hata hivyo huonekana katika majumba ya  
     kifalme.
- 29 "Viko vitu vitatu ambavyo vinapendeza katika  
     mwendo wao,

- naam, vinne ambavyo hutembea kwa  
mwendo wa madaha:
- 30 simba, mwenye nguvu mionganini mwa  
wanyama,  
asiyerudi nyuma kwa chochote;
- 31 jogoo atembeaye kwa maringo, pia beberu,  
naye mfalme pamoja na jeshi lake  
lililomzunguka.
- 32 "Ikiwa umefanya upumbavu na ukajitukuza  
mwenyewe,  
au kama umepanga mabaya,  
basi funika mdomo wako na mkono wako.
- 33 Kwa maana kama vile kusukasuka maziwa  
hutoa siagi,  
na pia kule kufinya pua hutoa damu,  
kadhalika kuchochea hasira hutokeza  
ugomvi."

## 31

### *Misemo Ya Mfalme Lemueli*

- 1 Misemo ya Mfalme Lemueli, usia wa mama  
yake aliyomfundisha:
- 2 "Ee mwanangu, ee mwana wa tumbo langu,  
ee mwana wa nadhiri zangu,\*
- 3 Usitumie nguvu zako kwa wanawake,  
uhodari wako kwa wale wanaowaharibu  
wafalme.
- 4 "Ee Lemueli, haifai wafalme,  
haifai wafalme kunywa mvinyo,  
haifai watawala kutamani sana kileo,

---

\* 31:2 Au: Ewe uliye jibu la maombi yangu.

- 5 wasije wakanywa na kusahau vile sheria in-  
avyoamuru  
na kuwanyima haki zao wote walioonewa.
- 6 Wape kileo wale wanaoangamia,  
mvinyo wale walio na uchungu,
- 7 Wanywe na kusahau umaskini wao  
na wasikumbuke taabu yao tena.
- 8 "Sema kwa ajili ya wale wasioweza kujisemea,  
kwa ajili ya haki za wote walioachwa ukiwa.
- 9 Sema na uamue kwa haki,  
tetea haki za maskini na wahitaji."

*Maneno Ya Mwisho: Mke Mwenye Sifa Nzuri*

- 10 Mke mwenye sifa nzuri, ni nani awezaye  
kumpata?  
Yeye ni wa thamani sana kuliko marijani.<sup>†</sup>
- 11 Mume wake anamwamini kikamilifu  
wala hakosi kitu chochote cha thamani.
- 12 Humtendea mumewe mema, wala si mabaya,  
siku zote za maisha yake.
- 13 Huchagua sufu na kitani  
naye hufanya kazi kwa mikono yenyе bidii.
- 14 Yeye ni kama meli za biashara  
akileta chakula chake kutoka mbali.
- 15 Yeye huamka kungali bado giza  
huwapa jamaa yake chakula  
na mafungu kwa watumishi wake wa kike.
- 16 Huangalia shamba na kulinunua,  
kutokana na mapato yake hupanda shamba  
la mizabibu.

<sup>†</sup> **31:10** Mithali 31:10-31 imetungwa kila mstari ukianzia na herufi ya alfabeti ya Kiebrania zikifuatana tangu Aleph (A) hadi Taw (T); zote ni 22.

- 17 Hufanya kazi zake kwa nguvu,  
     mikono yake ina nguvu kwa ajili ya kazi  
     zake.
- 18 Huona kwamba biashara yake ina faida,  
     wala taa yake haizimiki usiku.
- 19 Huweka mikono yake kwenye pia,  
     navyo vidole vyake hushikilia kijiti chenye  
     uzi.
- 20 Huwanyooshea maskini mikono yake  
     na kuwakunjulia wahitaji vitanga vyake.
- 21 Theluji ishukapo, hana hofu kwa ajili ya watu  
     wa nyumbani mwake,  
     kwa maana wote wamevikwa nguo za kutia  
     joto.
- 22 Hutengeneza mazulia ya urembo ya kufunika  
     kitanda chake,  
     yeye hucaa kitani safi na urujuani.
- 23 Mume wake anaheshimiwa kwenye lango la  
     mji,  
     aketipo mionganoni mwa wazee wa nchi.
- 24 Hutengeneza mavazi ya kitani na kuyauza,  
     naye huwauzia wafanyakishara mishipi.
- 25 Amevikwa nguvu na heshima,  
     anaweza kucheka bila kuwa na hofu kwa  
     siku zijazo.
- 26 Huzungumza kwa hekima  
     na mafundisho ya kuaminika yapo ulimini  
     mwake.
- 27 Huangalia mambo ya nyumbani mwake  
     wala hali chakula cha uvivu.
- 28 Watoto wake huamka na kumwita aliye-  
     barikiwa,  
     mumewe pia humsifu, akisema:

- 29 "Wanawake wengi hufanya vitu vyenye sifa nzuri,  
lakini wewe umewapita wote."
- 30 Kujipamba ili kuvutia ni udanganyifu na uzuri unapita upesi,  
bali mwanamke anayemcha BwANA atasi-fiwa.
- 31 Mpe thawabu anayostahili,  
nazo kazi zake na zimletee sifa kwenye lango la mji.

**Biblica® Toleo Wazi Neno: Bibilia Takatifu™  
Swahili: Biblica® Toleo Wazi Neno: Bibilia  
Takatifu™ (Bible)**

copyright © 2018 Biblica, Inc.

Language: Kiswahili

Translation by: Biblica, Inc.

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2021-04-12

---

PDF generated using Haiola and XeLaTeX on 18 Apr 2025 from source files dated 31 Aug 2023

9cbb05be-39f3-5d18-8b2a-4ba788541462